

Isáysarini kuku Isáysarinee kuku pakich kamanchintspa

¿Chakaja yandarang?

Isáysarini waanaatsi kuk yandarangiya. Apanll kamachtarangu, Utaáchchee tputsi waneerangiya. Irusarinash taarangiya. Kurak Osiyasarin taarangu, anush Apanllee kuk kamanimaam chtarangiya. Kurakawin Jotamarini, Akásarini, Esekiyasarini, ashpari taarangsin, Isáysarini Apanllee kuk kamanimantar ashirangiya. Isáysarini wizanllpat, wipapa tsimbun taarangiya. Isáysarini kurakamand tsipasamunparee, ¿tamarima kurakap pang' naataranga?

¿Chakaam yandarang?

Irusarinshucheeem kirakaa yandarangiya. Arapich tputs, Asiriyahuchsha kizpurimuncha tputsee wamari kasikastar ashishtaranaya. Utaáchchee tputs wamari kasimaam zandaranganaya. Ashirucha, Utaáchchich tputs punirpat taataranaya. Samariyshuchee tputs izuuru kasirangusin, muchchureem ínarangusin, arap machtaranganaya.

¿Mayaamaja yandarang?

Utaáchchich tputs kizpur kiyung kachiyaranganaya. Asiriyhuch tputs ichingaru masach kurikee zapan panangandama, táraganaya. Utaáchchee tputsi ashpatam putayarusin, araptam machtaranganaya. Ashkusin, Utaáchchichsha nda waanitaritam

taaranganaya. Nllitarit tputs wamari kasitaranaya. Ashirucha, nda kis taaranganaya. Isáysarini zapan waneerangu, Yutaritshishireetsis ksangtsa. Apanlleetsimari chinangtsa. ¿Mayaamsha kis apanllputsingaz chinaksa? tárangeya. Mishat, ayam Apanll waanaa wipaa zanganchima. Ashkachuri, kisshapari taatssa, Apanll átcha, tárange, tputssha mang' ksarangiya. **¿Mayaatseeja kamanik?**

Na yuwaa kamanku anoo kamanchintspa.

Kapitoro 1–39: Apanll wanásirinandari chinakiya. Ashirucha, kizpur tsiyantakiya yuwamand Utaáchich tputs yutarit taakanaya. Utaáchich kurakareew nda wanásir yaspatarangana. Ashirucha, uwshtisin tiptsir yutarit taarangusin, natsashish zapan taarangiya. Tsiyatssee yaramaaam izuuru pinasarangiya, watam yasampan nda tputsee tatsamooru naparanguwa. Anumand Apanllsha, Nuw Asiriyashuchee tputsi, misha Babiloniyahcheetstam zanganchima siyaa wanimama, tárangeya. Itaru, siynaa nuwash itsinsaru tachitkinaareesa, siyaa yusur istachintspa; siyaa tapachindachintspa, tárangeya. Anushsha Dapiyarini nlluranur kurakaam kinachu, urutamari tputsee ksutchiya.

Kapitoro 40–55: Apanll tiptsiree kizpuritaa waneerangu, arapchish tputs tsap machtarangitaatssin, tputssha kizpuritam mang' mantsarangusin, ashiritaa Apanllsha, Siy yusur nuwaa chinakinaareesa, nuwsha

siyaa tapachindachintspa. Yusur kisshapari taatssa, tárangiya. ¿Antaati apanllputs wizpur taar? Nda. Nuw maacheetsi ichinguru tinaranguri, ¿tamaree nuw siyaa nda yusur istachee? Siysa nuwaa kuki payukinaareesa, nuw siyaa yusur wanásir ksutchintspa, tárangiya. Apanll waanaatsi wipunashee kamankiya.

Kapitoro 56—66: Apanllsha, Ayamtaati nuw tsapurunasee kaneesich tínayaruri, tputs ichingurusin kisshapari taachinllinaya. Anush tputs ichingurusin, nuwaa kuki payuchinllinaya. Kisshapari taachinllinaya, tárangiya.

Nuw Isáysi yuwaa Apanll kamanirangu anoo kamanchintspa

¹ Nuw Isáysi Apanlee kuk kamanchintspa. Nuw apari Amoscha. Apanll nuwaa yámandarangiya yuwaa Utaáchchee wanichu anootsi. Yuwapur Osiyas, Jotantam, Ajastam, Esikiyastam kurak taarangana anpur Apanll nuwaa tsiyatarangu, anoo kamanchintspa.

*Utaáchchis, siy uru yutaritshishee kis chinaksa,
nuw siyaa waneekuri atina*

² Tsapurunasshuchis, kanindshuchtamtis ichingurus,

Apanllee kuk mazinangtsa. Apanll ateeja:

Nuw tputsireetsi ipareepzi ashiru yanungakuri,
siy kis kanungarangsa.

Ashiritaa, tputsirshti nuwaa natsarangusin,
nuwaa kasaranganaya.

³ ¿Antaati wakar wamkuree kuk nda mazinak?
¿Antaati burr minush tputs pang' watungasheem
nachungak? Nda.

Chinuz mang' ndunaritaa, mangoonkiya.

Itaru, nuw tputsiri mangsharitssincha.

Nuwaa nda pakchiyam chinakana; nda man-
goonkana.

⁴ ¿Nuw siyaa yutaritshishpaneetsis tamaycheezi?
Siy yutaritshisheetsimari uru chinaksa.

¡Siy shuchitampazis wipis ashirus yutaritshisheet-
sim kis chinaksa!

Nuwaatssha Taarashipaneetsi arap kasarangsa.

Nuw Apanlli siyaam Israelaamis taaritaati,
ashiritaa siy nuwaa wanllitarangsa.

Nuw siyaa kizpur chinarangitaati,
ashiritaa siysa nuwaa natsaksa.

⁵ ¡Mangishis nuwaa kapeetamaam chinachintar
ashiksa!

Nuw siyaa kapungtaa pzkoopkaz ashiruri,
siyaa waniwantar ashkitaati,

ashiritaa, nda siy kitsis mazinaksa.

Muchis chuwimpaz ashiksa.

Kapung tanukus, wizpuris ndunnaar taaksa.

⁶ Nutsis kpumawpaz ashirus ashchiri shuneekiya.
Nda pakchiyam matambish taaksa.

K'tsimandis káyaru, muchipis wásur shuneekiya.

Kpumaris, kuchakpaz ashiru kpuneekiya.

Minamtiyam tputs siyaa nda istaku,
irimiyyapat taparat, taparat nda ashkiya,
wásuree mayungamaama.

Ashikpaz ashkitaatis, nda kitsis mazinakus, yutaritshishee kis chinaksa.

⁷ Nuw siyaa waneektaati, itaru siysa nuwaa kuki
nda payukus,
kundararis siyaa kachingeersin, tsapuneetsis itutskachu,
Mzarshitis mangutarisha taakiya.
Ashkus, tatsumaris mangutarit itsankiya.
Siyaa pangis tirooksin, yaktaris mzeeztar ashkiya.
Saanasha anoo ngutis napataranll ashiksa.
Kundararis tatsumareetsis kis shamangayarusin,
katungkusin, kaching, kaching ashkanaya.
Sodomshuch tamarangpari ashiritam tsapunis
mangu kuree ashkiya.

⁸ Kundararis siyaa pacharangusin,
Syonshuchis minamaritis katuchim taaksa.
Na kundararis siyaam tsangakanaya.
Syonshuchis yakat tambaz ashiru mzatsip upusanand xiyaashkiya.
Sundarshat kachingamamari iturpipitaraa,
iturpipitaraa ashishtangat ashkanaya.

⁹ Kundararis ashirangtaa, nuw wizpurirpati,
nuwamari kasiyeeruri,
siyaa Utaáchcheetsis nayaniranguri,
nda siy musá tsiparangsa.
Ndunnaari siyaa istaranguri,
Sodomaa, Gomorshuchee tamarangpari
sheernapsinaya siyaa izuuru kachin-garanganaya.*

* **1:9** Yuwaa nish átu anootstam Romshucheema 9.29 tayusima kamankiya.

Apanll áttanda tángcha, tárangeya nuwaatsi.

Ashiriya, yutaritshishirimandis Apanllsha siyaa kapung waneekiya, nuw siyaa atina.

*Anoomcha, Apanlee zurumpatari chinangtsa,
nuw siyaa atashina*

¹⁰ Siy kurakis Sodomshuch tamapari ashirus mantsir taakis anis,

Apanlee kuk kaapaniri mazinangtsa.

Siy tputsis Gomorshuch tamapari ashirus yutarit taakis anis,

kitsis zurampatari mazinangtsa.

Apanll siyaa tayaspataku, anoo ngatintspa.

¹¹ Apanll Taarashipan ateeja:

¿Mayaamsa nuwaam maachee zapan wayaksa?

Opeejaa, wakaraatstam karupana, nuwaam wayayarus, muchkis,

anoo nuw kapung tsachiktana.

¿Antaati wayungunoo muchkis, anoo nuw ksaja ishingchee?

¿Maacheetsi ursir ksamatmaja napkee?

¹² Siy nuwash pangi kuseerus, maacheetsi nuwaam yushindaktaateesa, itaru, ¿chak siyaa, ngutis Apanllish pang' xitangtsa, tárallla?

¹³ Nuwaam maachee ngutis wayarintspa.

Watam an msas nuwaam nda wanasiwi.

Tputsee tushaneyeyarus,

Tsup kaneeschish shambateeni, atitaateesa,

Zar kanusishush tushiyani, atitaateesa,

itaru wand yutaritshishee kis payuksa.

¿Antaati nuw piy shingtsa, tárangee?

Anoo pamaam zandkeezi.

14 Tsup kaneeschish yakchu anush shaniyjis,
anoo nuw ksaja napkee.

¿Wanip ngutis ashiksa?

¡Wappa! Anoo zandkeezi.

15 Siy nuwaa mashamaam kuweetsis íwar it-sirkachis,*
anoo nuw pamaam zandkeezi.

Zapantaa nuwaa mashkus,
ashiritaa siyaa nda mazinakina.

Watam kuwis tputs ursir paxatasawa.

16 ¡Watsta! Yutaritshishireetsis ksangtsa.

¿Antaati siyaa yutaritshishireetsis nuw kis nap-kee?

¡Yutaritshishireetsis zurampatari ksangtsa!

17 Wanásiriri taangtsa. Anoori chinangtsa.

Itsinsaru taangtsa. Tputsee chinangtsa.

Saanpatatis istangtsa.

Mxaxzeewaa nayaningtsa.

Mashindoo tayutaritarinllpa,

Apanlli siyaa Utaáchcheetsis tárangya.

18 Apanll átcha:

Mazinangandama. Na tsiyatssee wanásir yareeni.

Wandaya siy yutaritshishiris kuraspaz ashiru
kizpur chumbeep paxataru,

ashiritaa nuw tachingkachuri, kizpur mburash
taatssa.

Kachizamash tamapari ashiru mburash taatssa.

Mishat, kamis kizpur kawambanataa, itaru opeej
pur tamapari ashirisha mburash taachiya.

* **1:15** Matiwa 6.5 tsiyatsis nipta tatsamooru taaritamta.

Nuw siyaa yutaritshishireetsis tachingkachuri,
amb ashikpaz ashtatssa.

¹⁹ Wandaya siy nuwaa kuki payukchus,
yusur mzarshis yuwariz kisshaparee
kanungchiya.

²⁰ Wandaya kitsis nda mazinakus,
kundararis waani shamangayarusin, siyaa
kiyung yachachintsa.

Nuw Apanlli siyaa atina,

Apanll waana nuwaa tárangeya.

Ashirucha, Apanllee zurumpatari chinangtsa,
nuw Isáysi siyaa atashina.

Waana Apanll Taarashipan Irusarinshucheet-sis izuuru yarchiya

²¹ Siy Irusarinshuchis, sirú Apanllee chinarangitaatis,
itaru natsha ¿tamaysha kiz mshipan tamaparee
ashirus nuwaa kasarangus, kis apanllput-
sush tachitaksa?

Sirútari siy tputsis ashparitis itsinsaru taarangus,
tputsee zurampatari tatsamooru istarangsa.

Ashirangtaatis, itaru natsha pachampaniri
taaksa.

²² Sirú siy ur tamapari ashirus wanasir taarangsa.
Itaru, natsha chkaz tamapari ashirus kinarangsa.
Kapusis kam ashirus taarangtaatis,
itaru na kizpur misingapishpaz ashirus
kinarangsa.

²³ Siy kurakaris na wits nda mazinaksin,
washchirpat tputsi kis amikurtakanaya.
Kurikingazim chinaksin, tputsee nda itsinsaru
chinakanaya.

Maachtangazimari támaraksin, mantsir
 chinakanaya.
 Mxaxzee nda nayaniksin,
 Mashindootstam nduntam pakchiyam
 istakanaya.

24 Yuwamand siy Utaáchchis yutarit taakis anumand, Apanll Taarashipan, yuw wamari kasiru an atiya.

¡Wapparita! Na siyaa kundartaranguri, wanich-intspa,

Yuwaa tumashtakis anoo tuwapamaama.

25 Nuw kuwipti wizpurirpati, siyaa wanichima.

Chkazeetspaz ashiru izuuru kapeetchintspa.

Yutaritshishireetsis ashparit kachingchima.

26 Ashkachuri, yusur shiyashuchsha yasampan tputsee tatsamooru chinachinllinaya.

Kuraksha wipunash yusur wanasis kamanchinllinaya.

Amb ashkachuri, tputsshá siyaa wanasis ínachinllinaya.

Siyaa Irusarinshucheetsis, Yakat itsinsampańcha; apanllpancha, siyaa táchinllinaya.

27 Nuw siyaa itsinsari yasarayuri, tapachindakchuri,

siysa yusur kis taatssa.

Siy Siyonshuchis, yusur nuwash kis tachitatssa.

28 Itaru, yutaritshishpan tputs nuwaa nda chinaku,

nuwsha anoo tputs toro, toro sheeruri kapeetchima.

Nuwaa kuki kapeetkusin, zurampatari tsipachin-llinaya.

²⁹ Ashirucha, nuw siyaa atashina:
Siy apanllputseem zapan kis nashamangamaam chapoom yanungarangsa.

Anush kis apanllputsee ungirtarangsa.
Itaru, anumand kapung pazichpasa.

³⁰ Pazikchus, tatsumimpaz ashirus mawirutssa.
Kung ndunpaz ashirus puzataraa ashitssa.

³¹ Tputs kizpurimuntaa taarangu,
itaru mashar puz ashiru kurachiya.
An tputs wanasmirimshingaz nazandku,
yuw tarawztarangu an, mikeeru kurakchu mach-ingchiya.

¿Tamareeja anoo ztazchich?
¿Chakaja anoo tputs istach?

Apanll átcha tángcha, nuwaa tárangeya.

Ashirucha, waana Apanll Taarashipan Irusarinshucheetsis izuuру yarachshapari, nuw Isáysi siyaa atashina.

2

Apanll Taarashipansha istakchu, tsapurunasush ztaru tputs mapiyrsin taachinllinaya

¹ Nuw Isáysi Apanllee kuk kamanchintspa.
Nuw apari Amoscha. Apanll waana nuwaa yámandarangiya. Yuwaa Utaáchchee, Irusarinshuchetstam tputs ashtachu anoo kamanchintspa. Apanll waana tárangeya:

² Yap tsapurunas tspakattu amb,
nuwsha Irusarinaa yakat mbamari wayachima.

Anush nuw pangí kizpur taachiya.
 Anu mach íwar pshkurutar ashku taachiya.
 Minup mach ningich taachiya.
 Amb ashkachuri, tsapurunasshuchsha tputs
 ichingarusin anush kuschinllinaya.
³ Tputs amb naakchusin, shurungakataraa
 sheersin,
 waanpatatin táchinllinaya:
 Pzaya. Apanllip machip káreeruni,
 Akoparinshini Apanllirini pang' pshtuyani.
 Amb ashkachuni, waana Apanll iyaa tayaspat-
 achiya.
 Waa kuk mazinaruni,
 Apanllish kissa tachiteeni, táchinllinaya.

Anushsha Siyonamand Apanlee Taarashipanee
 kuk tayaspatachinllinaya.
 Irusarinamand Apanlee kuk mazinachta-
 manaya.
⁴ Apanllsha Taarashipan tsapurunasee tputs itsin-
 sar yasachiya.
 Tputs waanpatatin tsiyatssee mantsir payukinaa-
 reesinaya,
 Taarashipansha waana tsiyatssee yarchiya.
 Anpur, ayamtaatiya tputs waanpatatin waratc-
 hazinllinaja.
 Tapazeetstam waanpatatin nda tayaspatachinlli-
 naya.
 K'chirpungoo mangutarisha payuchinllinaya.
 M'chitaatssha waratamapani mázareemsha
 tatsummapaneem ínachinllinaya.
 Turuwaatssha wareemsha ínachinllinaya.

⁵ Akoparinchichis, ¿mayaamsha kiyung kachiy-atssa?
 ¡Wanasir itsinsar taayani! Waana Apanll Taara-shipan iyaa 'sineekpaz ashkachu, kis taa-pani, atina.

Ashiriya, Apanll Taarashipansha ayam iyya istakachu, tsapurunasush ztaru tputs mapiyrshtisin taachinllinaya, nuw siyaa atina.

5

Utaáchich kizarun tatsumim tamapari ashirusintaakanaya

¹ Nuw Isáysi kizarunaa tatsumma yasichima.
 Nuw amikuri yuw kizpur taaku an wamin ya-sichima.

Nuw amikuri kizarunaa tatsumma ksutarangiya.
 Mázarush kizarun kizpur wanásir tat-sumarangiya.

² Wanásir puyayaru,
 Maachtáa patumbchee ichingaru kapee-tarangiya.

Kizarunaa ipus ipus sheeru, wanásirimsheetsi-mari tatsumarangiya.

Mázarish apusanand torre napamaam kayatarangiya.

Sheeru, Vinoo wayar waapi átu, kamiyamaam wayarangitamta.

Iwaparangu, wanuseemsha kutarangiya.
 Kam waapi, tárangitaa,
 waaj, kizarunsha kizpur kapiz yusirangiya.

³ Anumandsha amikuri Apanll, Yutaritischa, siy
Irusrarinshuchis.

Na pindanaru k'kuz mangeetsis p'tsimaam ka-
manchintspa, tárangiyá.

Utaáchchis, na nuwaa mangiptis kamaningan-
dama.

¿Chakamandaja chayarini mzats mantsir yusirang?

¿Antaati nuwamand ashirang?

¿Ndush mzats waanamandari ashirang?

⁴ ¿Mayaaja mzatseem pishtarang wanásir
yanungamaama?

Nuw siyaa, Kam yusichpa aturi,
itaru, siysa nuwaa tamapingarangus, kapizsha
yusirangsa.

⁵ Ashiriya, nuwaa kuki mazinangtsa.

Yuw nuw mangishi chinaki anoo kamanchintspa.
Mzareetsi watandpun kapeetkachuri,
waani arapich tputs, Mzatsee kachingpana, atina.
Ashkachuri, watspat kat, kat ashchinllinaya.

⁶ Nuw mzareetsi ndusha pakchiyam ktsutchima.

¿Chakaja karutaa púyach?

Kpanandarishaparee kxuneeru, karutamunaam
kinachiya.

Msaseetssha, Amb sinatpa, táchima.

Pakchiyam mzirimuni sinacheeja.

⁷ Nuwamari kasiruri, siyaa Utaáchcheetsis
atashina.

Nuw mzari watacha siyaya.

Nuw tatsumareetspazi ashiruri kizpur siyaa chi-
narangina.

Siy Israelchichis nuwpaz mzari ashirus taaksa.

Itaru, nuw siyaa, Nuwaa kuki payuchinllinpa,
tárangitaati,

Siysa pachampaneemarisha kinarangsa.
 Waanpatatin wanasis napchinllinpa; itsinsaru
 chinachinllinpa, tárangitaati,
 itaru, siysa tputsee kiyung yachakus,
 siyamun tputs kiyung kachiykusin,
 wasureemun, Ay átangat ashkanaya.*
 Amb ashirangus, kizarun wanus kapiz tamaparee
 ashirangsa.
 Ashirucha, anumand siyaa zurampatari kasach-
 intspa,
 nuw atashina, Apanll siyaa Utaáchcheetsis
 tárangeya.
 Utaáchchik kizarun tatsumim tamapari ashirusin
 taakanaya, atiya.

6

Waana Apanll nuwaa, Isáysaatsi ka-machtarangya

¹ Yuwapur kurak Usiyas tsiparangu, anpur nuw Apanllee parangina. Taarashipan kizpur 'sineerangu, wamari kasiru, waanamun watsirar kuxinarangya. Watunir wazuraneeru, waanaatsi pang' purangya.

² Waana tiptsir sumas ashiru Apanllimun iwaz itureeranganaya. Ichingaru wazitpungach 6 taarangya. Wazitpungachpa tsimbun waanaatsi wach kámanarangya. Tsimbunatam wanutsee watspatari kámanarangitamta. Itaru, tsimbunatam mangaktangat ashiranganaya. Waanpatatin tsiy-atkusin, táranganaya:

* **5:7** Lukasa 13.6-9 tsiyatsis nipta tatsamooru taaritamta.

³ Apanll Taarashipan wamari kasiriya.*
 Wanasisiriri chinakiya. Wanasisiriri taakiya.
 Kizpur wanasis' sineekiya.
 Tsapurunas shuneeriya wanasisrimshirini,
 ántar ashiranganaya.

⁴ Kizpur zunganeerangusin, Apanll pang'
 washitungash zpuzarangiya. Pangush wantsush
 msas tuwap mzeezarangiya.*

⁵ Anoo paranguri, nuwsha, Sitatstee. Nishuripa
 tsipachina, watam kchipti Apanllee nuw pa-
 keenawa. Kurakari wamari kasiru anoo pa-
 keenawa. ¿Tamari nuw mantsirimshee tsiyatkuri
 taaki? Nuw tputspa yutaritamashpa taakina. Si-
 statstee, tárangina.

⁶ Amb táranguri, Apanllsha tiptsir sumas ashiru
 nuwanung mangarangiya. Kucharash masunll
 Apanllish wasum yáyaru,

⁷ nuwash kuki chka' ashirangiya. Nuwaatssha,
 Masunll k'keetsish kandanirangu,
 na yutaritshireetsish ichingaru tachin-
 garangiya.
 Apanll shiyaa yutaritshireetsish zurampatari
 mbizayanlliya,

nuwaa tárangiya.

⁸ Tárangu, Apanllsha waana tsiyatku kímarangu,
 nuwaa tárangiya.

* **6:3** Apanll wanichu anu 4.8 tsiyatsis nipta tatsamooru
 taaritamta. * **6:4** Apanll wanichu anu 15.8 tsiyatsis nipta
 tatsamooru taaritamta.

¿Chakaatseeja nuw zangankachee?
 ¿Chakaatseeja nuwaa kuki kamanipaneem ínachee?

tárangu, nuwsha,

Apaa, nuwaa kamanipaneem ínayarush,
 zanganingandama,

tárangina.

⁹ Apanllsha,

Nuw shiyyaa zanganchinllpa.

Naayarush, tputsi yutaritaa Israelchichee kaman-
 ishini. Apanll ateeja, tángcha.

Nuwaa kuki zapantaa mazinakus,
 ashiritaa nda mangoonaksa.

Nuw kizpur istaktaati, anoo pakitaateesa,
 nduntam mangeetsis p'tsichima.

¹⁰ Siyaa mangeetsis tamiroosinlltakchuri,
 kitseetstamtis tamirkachuri,
 kcheetstamtis kámanakchuri,
 siysa ¿tamareeja mangoonchis?

¿Antaati mazinacheezis?

¿Nitaati pangcheezis? Ndambaree.

Mangoontapa, siyaa aturi,
 nda siyaa yaramaaam zurampatari zandkina.*

Apanll átcha tángcha, tárangya nuwaatsi.

¹¹ Nuwsha, Apaa, ¿ashinoja amb ashchinllina?
 táranguri, Apanllsha,

* **6:10** Yuwaa nish átu anootstam Matiwa 13.14-15; Márkosa 4.12;
 Lukasa 8.10; Wanga 12.40; Tayaspatampani 28.26-27 tayusima
 kamankiya.

Anoo tputs izuuru kachiykachuri,
 pakchimarisha katuchkachu,
 anootsimsha ayam zapish yusur tputsireetsi chi-
 nachima.

Israelchichee yaktarini izuuru pátangachinllinaya.
 Ashkatssin, tputs ndunichparee.

Pangush minamtiyam tputs nda taachinllinaya.
 Mázarish mangu kuree ashtachinllinaya.

¹² Nuw anoo tputs arap minup tsap tuzanga-
 neekchuri,

Utaáchchish watsapun tputs izuuru ndunichiya.

¹³ Wandaya chungaa arangeem tputs minam
 taarinaariya,

anootstam kapeetchima.

Yasinaa washitanee tuwayaruch,
 izuuru kapeetkachuch,

Puchimsha pshkoorutar ashtaru ashtachiya.

Itaru, xixpurootspaz ashiru tputsireemi yusur
 katuchimaa wayachima.

Annaa tputs nuwaa kuki mazinachinllinaya.

Anush tputsireetsi yusur chinachima,

tárangiy Apanlli nuwaatsi.

Ashirucha, Apanll nuwaa Israelchichee tputsee
 kamanimaam nuwaa zanganirangiya.

7

*Nuw Isáysi kurakaa Ajasa Apanlee kuk ich-
 takachuri kamanirangina*

¹ Síriyshuch kurak, Resín Israelshuchpat urkar
 tsiyatarangu, Zuwa Pékaa, Irusarinshuchpat
 warateeni. Yamari kasiyeeruni, kasayani,
 tárangitaatssin, xapooranganaya. Anpur kurak

Ajas Irusarinshuchee ksutarangiya. Ajas watacha Jotamarini wipa.

² Síriyshuch urkar tsiyatssipanee tputs Ajasap zanganirangu, kusarangiya. Iy Síriyshuchini Efrayinchichpa amikurtaranguni, siyapa waratamaam zandkiniya, tárangiya. Ajassha anoo k'kuz mazinarangu, kapung punirangu, kizpur kambustaku yasin shpu shpu shitangat ashtaru, ashiru kizpur puniku, ta ta shitar ashirangiya. Sitatstee. ¿Tamachina? tárangiya.

³ Itaru, Apanllsha nuwaa tsiyatarangu, Isáysaa, shiy iparpatish, Seár-yasubpa ipuneerush, kurakap Ajasap napashincha. Ajas tsap kpimash kung tashtap taariya. Ngootsip yap chirikoo káchakana amb naangcha. Ajasaa anush chamayangayarush, nuwaa kuki kamaningcha.

⁴ Papcha, ichee, kurak Resínpa, min Pékpa amikurtarangitaatssin, anoo tputsi punirinllpa. Itaru, shiynaa kizpurtangcha.

Kizpuritaa tsiyantaksin, itaru mangu ashtachinlinaya.

Sumas mangu mzeetar ashtaru ashtachinllinaya. Kurak Resín wamkurpat kurakpat Pékpa mangu nllur tamaparee ashirusin taakanaya.

⁵ Síriyshuch Efrayinshuchpat washunand shiyya kiyung yachamaam zandkanaya.

Uwshtisin shiyya táranganyaya:

⁶ Pza, Utaáchchish watsapun pshtuyaruni, tputsee tpuxtarunni,
iyamari kasiyaruni, kasayani.

Sheeruni, Tabeelarineetsi wip kurakaam ínayani,
tárangeanaya.

⁷ Itaru atitaatssin, Apanllsha:

¡Ayamtaati ashtachazinllinaja! atiya.
Mazinangcha. Resín yaktarini

Damásokcha, Síriyash tsap taariya.

⁸⁻⁹ Pék yaktarini Samariycha, Efrayinash tsap
taaritamta.

Itaru, nimun 75 masach tushiykchu,
Efrayinshuch tputs izuuru tsípachinllinaya.

Siysa Utaáchchis ndunnaa sambaytakus, an
tputs siyaa nda izuuru kachingkachinllinaya.

Ashiriya, paptsa. Punirustarintspa, Apanll átcha,

nuw siyaa atina.

Ashirucha, Apanllee kuk zurampatari mazi-
ngantsa, nuw atashina.

*Nuw Ajaspayusur tsiyataranguri, Emanowela
kamanirangina*

¹⁰ Apanllsha Taarashipani yusur tsiyatssee
Ajasaam kamachtarangiya.

¹¹ Shiysha, Ajasaa, Apanllee, Tsapush wantsush
wizpurirish yámandanda, tángcha. Wandaya anoo
nda zandkush, kanindash íwar yámandanda,
tángcha, waa kuk zurampatari yasamaama,
tárangina.

¹² Ajassha, Nduni. Apanllee nguti mashcheezi,
ndambari. Watsta, tárangeiya.

¹³ Tárayaru, nuwsha:

Dapiyarinchichis ichingarus mazinangtsa.

Siy ngutis tputsee kuk ngataksa. Ngatkus,
¿mayaamsha

Apanllee kuk tuxaraksa?

¹⁴ Itaru, siy nduntaa Apanlee Wizpurirish yámandanda, átus, ashiritaa waana Apanll siyaa yámandachiya. Apanll kuk zuramaritcha, tátssa.

Mazinangtsa. Kiz kamasin mireeyaru, kamuz tatsipchiya.

Tatsipkachu, Emanowelaa yásamachiya, watam Apanll iyapa taakuwa,* táchiya.

¹⁵ Nllur ndaturi putsisaru, wand mangsharit taaku, kesoa kindurpa katungchiya.

¹⁶ Itaru, ndaturi yutaritshishee kasaru, misha ndaturi wanasisirmshee chinaru, anush Efrayinshuch tputs urkarpatari ndunichiya.

Síriyshuchsha tputs urkarpataritam tsípchitamparee. Watsapunsha mangu kurimunaziri taachiya.

¹⁷ Itaru, Apanll shiyaatstam, tputsiriptartis, iparpatatamtis wanichiya.

Waneeshshee sirútama nduntaa ashiru nda patarus, waneeshimun kiyung kachiyatssa. Apanll

Efrayinshuchee, misha Síriyshuchetstam waneekchu, itaru siyaatsinaa ningattam wanichiya.

Asiriyshuch tputs zapan kuschinllinaya.

* **7:14** Yuwaa nish átu anootstam Matiwa 1.23 kamankiya.

18 Apanll Ijiptomand arap tputsee kungumand
aship yáyanll zanganchiya.

Asiriyshuchsha tputs aship zan kuschinllinaya.

19 Kuskatssin, tsapunshis shuneeru pshtuchinlli-
naya.

Wazanganash taachinllinaya.

Patumbchish wach, misha kpashtam, misha kung
wanasirimshishtam taachinllinaya.

20 Apanll shiyyaa ashkachu,

Asiriyshuch kurak wachinpatri siyaa kiyung
yachachinllinaya.

Kung Eufratisamand kuskatssin, siyaa
ipazamaam

suseetsis, mucheetstamtis, tandacheetstamtis
puris kumachinllinaya.

21 Shiyachich tputs kapung mariz kayatchinl-
linaya. Tputssha minamari wakar, opeejpatari
tsimbunandari chinuku,

22 ¿tamareeja mimir zapaneekchu, wayayaru,
kesoa katungchis? Yuw tputs katuchim taaru,
¿antaati an keso kindurpat katungchazinllinaja?
Watam iwariz kapung maringachuwa.

23 Mzarhis mangu kpanandari taachiya.
Anush sirú mzarhis kizarunaa zapan milo
yanungarangsa. ¿Kurik mbammash wanipaja
mil taaranga? Itaru, natunaa karutanandarisha
taachiya.

24 Kapanandarisha mzarhis yambutachiya.
Anush pshtuyarush, k'chirpunguriptish
napamaam waritariya.

²⁵ Kizpur punikus, m'chitariptis ndusha puya-maam waritatssa, watam anush wakar opeej-patari mangu xitangat ashchinllinawa, nuw siyaa tina.

Ashiriya, paptsa. Yuwash Emanowel kuskachu, anush siy kiyung kachiyatssa, nuw siyaa atina.

8

*Apanll Asiriyashchee wanimpaneem
wayarangiya*

¹ Apanll Taarashipani nuwaa, Shiy Isáysaa, patumbchee yáyarush, anush, Maher-salal-hasbasa átush yandangcha.

² Anoo yandayarush, tputsee kamanipaneem nachungangcha, tárangiya. Nuwsha tputsee nachungaranguri, Uriyasa, misha Sakáriyas, Jeberikiyasarini wipa nuw parangina.

³ Anumunsha, izanllpati maaranguri, izanlli nlluraa mireeyaru, kamuzaa iparinarangiya. Izanlli Apanlee kamanimapanitamcha. Apanllsha nuwaa, Ipareetsish Maher-salal-hasbas ísamangcha.

⁴ Ndatuma iparish, Apaa, misha Ataa, táru, arapich tputs Síriypat, misha Efrayinpata tam waratchinllinaya. Yaktaa Damáskoo, misha Samariyaatstam kasikchusin, pangoo ichingaru kapeeteersin, maachiritaa izuuru yachinllinaya. Urkireetstam ichingchinllinaya, Apanll nuwaa tárangiya.

⁵ Yusur Taarashipan nuwaa tsiyatarangu, tárangiya.

⁶ Siyaam Utaáshucheemis, Sitatstee, atina.

Kung Silowepaz ashirus apinll naantar ashkus taaksa.

Siy Resínaa, misha Pékaatstam punirangus, Asiriyshuchpa amikurtarangsa.

⁷ Yuwamand siy Asiriyshuchpa tputs amikurtarangis anumand,

Apanll siyaa waneekchu, kung Eufratis ashiru kumbiyaru,

siyaa kizpur zaw ashtachiya.

Asiriyshuch urkar wasundururpat zapan siyash kuskatssin, siyaa uru kasichinllinaya. Kung wingoo putaru sheersin,

tsapuruneetsis izuuru itutschinllinaya.

⁸ Kungpaz ashiru kumbiyaru, Utaáshuchee watsapun izuuru puchiya.

Tputsee wayarpunumun tutsipchiya. Ashkachu, kiyung kachiychinllinaya.

Yunganpaz ashiru wazitpungichpat

tsapuneetsis izuuru yambutakpaz ashchiya.

Asiriyshuch tputs ashikpaz sheeru, izuuru siyaa kasichinllinaya.

Emanowel iyash taaktaa, ashchinllinaya.

⁹ Aparich kurak ateeja. Shaniyeerus, nuwaa kuki mazinangtsa.

Mazinakchus, kizpur puningtsa.

Maachee tapazpanee zapantaa xanatarus, ashiritaa siyaa tpuxtachintsa.

¹⁰ Mangishis kapungtaa chinakus, izuuru xapoochpasa.

Piy sheeruni, kasichinipa, atitaatis, itaru izuuru pinasatssa.

Pinasakitaatis, itaru watam Emanowel iyapa taakuwa;
iyaa kapung istakuwa, siy uru taachpasa,
Apanll nuwaa tárangeiya.

Ashiriya, punirintspa, nuw Isáysi siyaa atashina, watam Apanll iyaa ksutkuwa.

¿Mayaamaja tputsee punichich? Apanlleetsimari punimaam waritakcha

¹¹ Apanllsha Taarashipan kuweetsi kizpur patsisayaru, Utaáchchish tputs tchitinllpa; an tamaparee ashiru chinarinllpa, nuwaa tárangeiya.

¹² Piyartach tputs, Amikurtayani, atitaatssin, itaru siysa Utaáchchis anoo chinarintspa. Tputs nllitarit kizpur puniktaateesinaya, itaru siynaa punirintspa.

¹³ Apanlleetsimari puningtsa, watam wamari kizpur taakuwa. Apanlleetsimari chinangtsa, nuw siyaa atashina. Apanll chiyaa napku, ¿chakaja tasasach?*

¹⁴ Watam Apanll siyaa ksutkuwa. Itaru, Apanllimunari xarashish taariya. Xarakchus, izuuru pantsaksa. Siy Utaáchchis, misha Efrayinshuchitamtis Apanllimun patumbchimunpaz ashiru xarakus, pantsaksa. Ashkus, Irusarinshuchtam ashpari pantsachinllinaya.

¹⁵ ¿Tputs wanipaja pantsaksin, tsipakana?
Ashirucha, Apanlleetsimari punimaam waritakiya, nuw Isáysi siyaa atashina.

Nuw Isáysi nuwaanaatsi ipunshi waneerangina

* ^{8:13} 1 Pitoru 3.14-15 tsiyatsis nipta tatsamooru taaritamta.

16 Nuw ipunsheetsi tárangina. Siy nuwaa kuki mbizarintspa.

Nuw siyaa wanekuri,
siysa zurampatari payungtsa.
Izuuru mangishis pshtangtsa.

17 Apanll Taarashipan

Akoparinchichee tputs tsiyantarangu,
uwshtisin Apanlee kuk payumaam
pinasaranganaya.

Ashiritaa, nuw urutamari Apanllimun mangi tatkina.

Apanlee, Shiy nuwaa istangasindama, tárangina.

18 Taarashipan nuwaa ipusarangiya Israelchichee mangoo p'tsimaama.

Apanll nuwaa ipari wayarangiya Irusarin-shuchee tpuxtamaama.*

Waana kizpureeru, Siyonamand nuwaa ashirangya.

19 Itaru, ayam Israelchichisha tputs siyaa táchinlliniya.

Kanizee mashangtsa.

Wázirir wee wee tákchusin,
Siyaa istachparee.

¿Watam yaana anoo apanlliriniwa?

Uru chiy tputsich kchit taakuch, kanizee mashamaam chinakaniya wasina yasamaama.

20 tputs siyaa táchinllinaya. Ashiriya,
nuw siyaa atina. ¿Antaati nguti áti? nda. Siyaa zurampatari uru táchapsiniya.

* **8:18** Yuwaa nish átu anootstam Utaáshucheema 2.13 tayusima kamankiya.

Atitaatssin, itaru anoo mazinarintspa, watam mangshari ashiru atanawa.

21 Yuw tputs atana an kiyung kachiychinllinaya.
 Mariz kapung kayatkusin,
 mangu piyari xitangat ashchinllinaya.
 Marizimun watsiyun kizpur musáchinllinaya.
 Urkaree kapeetamaam zandchinllinaya.
 Waanaatsisha apanllirini yutaritaam
 ínachinllinaya.
 Kanindapsha nachayarusin,
22 tsapush napkusin,
 mantsirimsheetsimari pangchinllinaya.
 Tputsee kiyung yachaksin, Ay átangatkana,
 anootsim mazinachinllinaya. Ashkusin,
 ichingaru mantsirish tunimash taachinllinaya.

9

1a An tputs kiyung kachiykita taaksin,
 kamungumaam wanindaja,
 nuw siyaa waneekuri, ipunsheetsis atina.
 Ashirucha, nuwaa kuki mazinangtsa;
 mbizarintspa, atashina.

*Ayam zapish Apanll ipusamarini kuskachu,
 mapiyshapsinaya tputs taachinllinaya*

1b Ichtaru Apanll Galileyshuchee tputs kiyung yacharangiya. Uwshtisin arapich tputs Sabulónush, misha Neftaliyash watsapun taaranganaya. Ortagamand wing káyaruch, zar puku amb naayaruch, maramun wing kusachchi. Sirútamasa Apanll anoo tputsee kiyung yacharangitaa, itaru zapshinaa kizpur

wanasireemsha ínachiya. Anoo nuwsha Isáysi kamankuri atashina.

² Siyaa Galileyshuchee tputsis tina:
Tapshutaa taakus, kiyungtaa kachiykus,
itaru zapshinaa 'sinee kizpur pangatssa.
'Sinsha siyash kuskachu,
siyaa tuwasinichiya.

Ndusha yutaritshishush tunimushpaz ashirus
taatssa.*

³ ¡Apaa, shiy iyaa mangeetsini ksashishsha wa-
yarangsha!

Natunaa shiyapa taakurini,
shiyaa tasaseeruni, kisshana taachiniya.
Tputs katungtsee zapan pusaksin,
tputs maachee zapan mangu pana, pana ashkana,
ashikpaz ashkuni, mangini ksachshapariniya.

⁴ Watam tputs iyaa tamuchchurtarangusin, itaru
shiysha, Watsta týayarush, iyaa itutsirangshawa.
Shiyamari izuuru tputsee kasirangush,
Madiyanshuchee kasirangish ashirangtamsha.

⁵ Wasundaruree wasapturi itutseerush,
misha wamaree kuras ixataru,
anoo ichingaru sumasish kapeetachpasha.

⁶ Waana Apanll iyaam nlluraa wayarangiya.
Nllursha nllurtakachu, kanungeeru,

kizpur kurakaam kinachshaparee.

Kurakaa ichingaru wamari kasichiya.*

Nlluraa Apanllee ipusamarini ísamachinllinaya.

* ^{9:2} Yuwaan nish átu anootstam Matiwa 4.16; misha Lukasa 1.79
kamankiya. * ^{9:6} Matiwa 27.28-29; Wanga 19.2-3 tsiyatsis nipta
tatsamooru taaritamta.

An nllur kizpur mangoozee p'tsimpancha.
 Apanlliritcha wamari kasiriya.
 Apanll Taarashipancha. Apanll urutamarit
 mapiyimash
 mangoozee panakiya, nlluraa táchinllinaya.
⁷ Uwsha nllur kurakaam kinayaru, Dapiyarinish
 zamuchiya.
 Tsapurunashuchee tputsi ztaru ksutchiya.
 Urutamari tputsee tatsamooru napchiya.
 Yutaritshishpanee waneeyaru, wanasisimshee
 tputsi zurampatari istachiya.
 Ayamtaatiyam mapiyishish nda pastachiya.*
 Apanll waana iyaam nlluraa wayachiya, nuw
 Isáysi siyaa Galileyshuchheetsis atina.

14

*Israelchich tputs Babiloniyshuchee urkari
 kizpur stachinllinaya*

³ Siy Israelchichis, mazinangtsa. Apanll iyaan
 kizpur tapachindachiya. Ashkachu, ndusha
 kiyung kachiychininya. Tputssha nduntam iyaan
 tumuchchurtachinlliniya.

⁴ Anpursha iy Babiloniyshuchee urkari sta-
 chiniya. Stakurini, yaseesshee kis yasichiniya.

⁵⁻⁶ Apanll Babiloniyshuchee urkar kapee-
 tarangiya.
 Nimun arapcheewaa tputs yusur nda kiyung
 yachachiya.

* ^{9:7} Lukasa 1.32-33 tsiyatsis nipta tatsamooru taaritamta.

Yuw tputsee pakchiyam nda nayanirangu, an kurak na pastarangiya.

⁷ Na tsapurunasshuch tputs ichingarusin mapiyr-shapsinaya taachinllinaya.

Mang' kis yasiyastar ashchinllinaya.

⁸ Shiy Babiloniyshuchish kurakish na tsiparangush, Libanshuchee wárpanari

nda tuwakush, karipansha

ksatam taachiya. Apanll shiyyaa

Babiloniyshuchetsish kurakish na wa-neerangiya.

¿Antaati shiy karipanaa na yusur tuwakush kiyung yachacheezish? Ndambari.

⁹ Kanizpitam naatarangush, amb kaniz shiyyaa paksin, zamangachinllinaya.

Maamaartaatssin, támearsin,

shiyyaa paksin, shitungartakanaya.

Kaniz urkareew ashparit uxinashee kasayarusin, shiyyaa chamayangakanaya.

¹⁰ Shiyaa chamayangayarasin, atanaya:

Na shiy wizpurirish nduneerangu, ningeem kanizshutam kusarangsha.

Iy tsiparangini, shiy ashiritamtish tsiparangsha.

¹¹ Ngutish ungareem taarangush, itaru natunaa mantsirishtam taakamatsha.

Mangish kis kitarpa michitarangush,

natsha mbich shiyyaa nutseetsish katungkana.

¿Tamaysha shiy kizpuritaatish ashirangsha?

kaniz staksin atanaya shiyyaatsi.

12 Babiloniyshuchetsish kurakish, nuw shiyyaa atashina.

Kizpuritaa taarangush, shiyamari tsapu-runasshchee kasirangsha.

¿Tamaysha shiy kanindash kizpuritaa taarangush, natsha tsapush pantsarangsha?*

Shiy, Nuw Apanll tamaparee ashiruri kizpur taakina, tárangitaatish, itaru natsha pantsataraa ashirangsha.

13 Itaru, shiy tárangimandish:

Nuwamari kanindap káreeruri, anush tsirari mbam wayayaruri, anumun nuw kuxinxinaw ashtachima.

Amb ashkachuri, Apanll tínamarini, tsangachtam ichingaru tsapush taachinillinaya.

Machimun apanlleeruri, Apanllpa ipuneeruri, taachina.

14 Msasee arang káreeruri,

Apanllpaz ashiruri kizpur kurakaam kinachima, tárangsha.

15 Itaru, na ¿tamasha ashirangsha?

Waj, Apanll shiyyaa tsapush kapeetarangu, marush wantsushpaz ashiru yangakataraa ashirangush,

kanizshutam taaksha.*

16 Tputs shiyyaa atusin,

mangu napataranll ashkanaya.

Pakchusin, shiyyaa atanaya:

* **14:12** Apanll wanichu anu 9.1 tsiyatsis nipta tatsamooru taaritamta. * **14:15** Matiwa 11.23; Lukasa 10.15 tsiyatsis nipta tatsamooru taaritamta.

¿Chak in ashtar?

¿Ndusha yuw tputs tsapurunasee tpuxtarangu an?

¿Ndusha tapazpan taarangu,
wamarisha kasirangu, nda an?

¹⁷ Sirú yaktaa kapeetarangush,
tsapunandari taarangu,
Tputsee tumanarangush, tashitungamaam nda
zandarangish.

¿Antaati shiy wattish? Ndambaree.

Itaru na ¿tamaru taaka?

Tputs shiyaa atanaya.

Nuw shiyaa Israelshuchetsis Babiloniyshuchee urkari kizpur stakus tángtsa tina.

25

Apanll tsapurunasshuchee tputs ztaru sham-batamaama yambichiya

⁶ Apanll wamari kasiru,
nish Irusarinush shambatshisheem wayachiya.
Ztaru tputsee tsapurunasshuchi katungamaam yambichiya.

Anush katungats kizpur wanasis wayachiya.

Tputs kisshapari katungchinllinaya.

Katungkusin, ksamat vinoo waachinllinaya.

⁷ Anush Apanll kizpur istakachu,
ksushish ndunshapari taachchi.

Ayamtaati tputs mang' nda mantsachinllinaya.

⁸⁻⁹ Tputssha ndusha tsipachinllinaya.*

* **25:8-9** 1 Koríndshuchema 15.26, 54 tsiyatsis nipta tatsamooru taaritamta.

Suris nduntam taachiya.*
 Apanllee tiptsir nduntam pazichinllinaya.
 ¿Chakaja mantsiri tsiyatach?
 Anush tputs mang' kis taachinllinaya.

Tputs anoo tsiyatkusin,
 In watacha iy Aparini.
 Waamun mangini taturanguni,
 iyaa kizpur tapachindarangiya.
 Ashirucha, mangini kis, Jay, jay táyani! atashina.
 Watam Apanll iyaa tapachindaranguwa,
 tputs táchpasinaya.

Apanll zurampatari ashtachiya, watam waana
 ashtachima tárangeuwa, nuw Isáysi siyaa atina.

32

Kurak wanasirimish Apanlee tiptsiri ksutchiya

¹ Nuw Isáysi arangeem Apanlee kuk kamankina.

Yuwash waritakchu anush, kurak wanásirimash
 nuwaa tputsiri ksutchiya.
 Kuraka wipunashpatari wanásirinandari
 ksutchiya.
 Tputsee ichingaru tatsamooru napchiya.
² Tputs kiyung kachiykana, anoo tapachindachiya.
 Undararsha, Pachapani atitaatssin,
 kuraksha tiptsiree tapachindachiya.

* **25:8-9** Apanll wanichu anu 7.17; 21.4 tsiyatsis nipta tatsamooru taaritamta.

Mantsirimish tushiykchu, uwsha istachiya.
 Waanpatatin shuchimaam ndunshaparee
 chinachinllinaya.

³ Kuraksha uru wanasir napchiya.
 Tiptsirsha, Papcha. Tputs nuwaa kiyung
 yachakachpa, tákchusin,
 kuraksha mazinakchu, wanasir istachiya.
⁴ Mang' putitiri, itsinsaru chinachiya.
 Zurampatari tsiyatchiya.

⁵ Yuw tputs yutaritshishpan taakana, misha tput-
 see kiyung yachakana anoo,
 ndusha kurak kis napchiya.

⁶ An tputs yutaritcha.
 Watam tsiyatkusin, mantsir tsiyatkanawa.
 Tputsee kiyung yachamaam chinakanaya.
 Tputsee pachamaam zandkanaya.
 Tputs mariz kayatkana, anoo
 ¿nitaati pakchiyam nayanikazinllinaja?
 Katungtsee nda panakanaya: waamaamtam nda
 yáskanaya.
 Mishat, ¿Antaati yuwaa nuw ngichki anoo Apanll
 yasakeeja? atanaya.

⁷ An tputs kizpur ngichimapancha.
 Mangush chinachintar ashkusin,
 tputsee kiyung yachamaam chinakanaya.
 Pukiree tputs nduntam pakchiyam istakanaya.
 Kiyung kachiykana anoo nda nayanikanaya.

⁸ Itaru, wanasirimashsha tputs nda ashkanaya.
 Wanasirmsheetsimari chinakanaya.

Tputsee itsinsaru napkanaya.
 Anumun mangich tatkuch, ndusha chiyaa
 tamapingachiya.

Mishat, nuw kizaatstamtis arangeem waneekina.

⁹ Nuw siyaa kizaatsis waneekuri, atashina, Mazi-nangandama.

¿Mayaamsa kizis siy piyari chinaksa?

Siy naturi mapiyrus taaksa.

Kaapa nuwaa kuki mazinangtsa.

¹⁰ Iyaam ichingaru wanasisircha, átpasa.

Itaru, nuw siyaa atashina:

Nduma in masach tushiyru,
 kizpur punikus, nutsis ta ta ashitssa.

Watam marizimun tsipatssawa.

Waamaamtam ndunarichuwa.

¹¹ Mangoonpana aturi, siyaa tsiyatssee tayuschima.

¿Mayaamsa piyari chinaksa?

Siy naturi mapiyrus taaksa.

Itaru, zapish kizpur punikus, nutsis ta ta ashitssa.

Punikus, kamareetsis wanasisirmshee kasayarus,
 chirik' kamartatssa.

¹² Kchishis suris xuwat xuwat ashkachus,

yuwaa áti anoo pangatssa.

Mzareetsis, tirikootstam, kizarunaatstam,

¹³ pangeetstamtis, anoo ichingaru kapeetamaw pangatssa.

¿Waninll anumun mangis kis taarangsawa?

Itaru, nimun an ichingaru karutamunaam kinachiya.

¹⁴ Yaktash Irusarinush yuwash nuw taarangi anush tputs tatsitaritaa taarangu, itaru, nimun uru kurimunazshapari taachiya. Kurak pang' kurimunaztam taachiya. Sundar ksutamapan kuree ashchiya. Irusarin izuuru kurimunazkachu, burr kayustan anush kis taachinllinaya. Mangu pastoomarisha kinachiya, nuw siyaa kizaatsis atina.

¹⁵ Itaru, Apanllsha iyaa istakchu, waana wani wizpuriri zangankachu, iyaa istachiya. Waana wizpuripa tsapoo puz mzareemani kizpur wanasiereemashat panachiya. Sin ndusha pishtaku, yuwariz kisshapa kanungchiya.

¹⁶ Tputssha waanpatatin kis taaksin, waanpatatin ndusha kiyung yachachinllinaya. Israelshuch tputs ashpari kis taachinllinaya.

¹⁷ Kurak tputsee tatsamooru napkusin, uru mapiyrsin taachinllinaya.

¹⁸ Nuw tputsiri waanpatatin, Zuraktishcha tákchusin, anumun mangich tatuchpachi.

¹⁹ Sis kizpur pantsatkachu, mangin yurangakchu, Irusarin yusur yurangakchitaa,

²⁰ ashiritaa, kis taatssa.

Mzareemis sin ndusha pishtachiya. Chineemis pasut izapaneekchu, chinshitish kis taachinllinaya,

Apanll nuwaa tárangeya.

Ashirucha, mangis mantsarintspa. Kurak wanasisrimish kuskachu, Apanlee tiptsiri uru ksutchiya, nuw siyaa atashina.

40

Apanll Irusarinshuchee mangoo tusichimaam k'kuz wanasisrimash tsiyatarangya

¹ Apanll waana ateeja:

Israelchichee mangoo tusichimaam wanasisir tsiyatangtsa.

² Nayanimpatari Irusarinshuchee tsiyatangtsa. Sirú m'chachumuntaa taarangsin, na tushiyanilya.

Yuwamand yutarit taarangana anumand túmshir tuwaparanganaya.

Nuw Apanlli Israelchichee waneekuri, kuwihti pzkoorangina.

Yutaritshishimand wappari kiyung yacharangina.*

³ Wanimaaam na iwaparanguri, natunaa tputs tayaspatakchu anoo kisshapari mazinachinllinaya.

Mazinangtsa. Na kurak kizpur naanllpa. Tsap puzaa ngootseem wanasisir yarangtsa.

Ngootsee itsinsaru tuwitangtsa.

Apanlleem yarangtsa, watam kuschuwa.*

* **40:2** Apanll wanichu anu 18.6 tsiyatsis nipta tatsamooru taaritamta. * **40:3** Yuwaa nish átu anootstam Matiwa 3.3, misha Márkosa 1.3, misha Lukasa 3.4-5, misha Wanga 1.23 kamankiya.

- ⁴ Wazawaa tupareerus,
machee kapeeteerus, itsinsaru tuwitangtsa.
Yuwaa machtaru anoo watandsaam ínayarus
ksangtsa.
- ⁵ Apanlleem ashikpaz shingtsa mangeetsis yara-
maama.
Yutaritshishireetsis kapeeteerus mangeetsis
Apanlleem yarangtsa.
Ashkachus, Apanllsha Taarashipan kizpur
wanasir napchintsa.
Ztaru tputs tsapurunasush Apanllee pangchinlli-
naya.*
¿Antaati ngichkeezi áti? nda.
Watan waana Apanll nuwaa kamanku táranguwa.
- ⁶ K'kuz íwarimand kímarangu, nuwaa, Kizpur tsiy-
atangi, tárangya.
Nuwsha, Kizpur tsiyatkuri, ¿ameecheezi? tárangina.
Uwsha, Tputs ichingarusin chirichir tamapari
ashiru taakanaya.
Wanuts chap ashiru musásimashcha.
- ⁷ Waana Apanll chirichirimun tapus ashkachu,
chirichirsha mawirutaraa sheeru,
chap kurustariya.
Tputs ashiritamcha; chirichir tamaparee ashiru
nda kizpur taakanaya.
- ⁸ Tputs chappaz ashiru mawiruyaru kuruschiya.
Itaru, Apanll kuk urutamari taachiya.
Uw kuk ayamtaatiya pastacheeja, ndambaree.*

* ^{40:5} Wanga 1.14 tsiyatsis nipta tatsamooru taaritamta. * ^{40:8} Sandeeku 1.10-11 tsiyatsis nipta tatsamooru taaritamta; Yuwaa nish átu anootstam 1 Pitoru 1.24-25 tayusima kamankiya.

Apanll waana nuwaa tárangiya.

9 Siy Siyonshuchis, mazinangtsa.
 Machimun íwar káreerus,
 anush kizpur tsiyateerus,
 Utaáchich tputs ichingaru mazinaksin, anoo ka-
 maningtsa.
 Tsiyatssis kizpur wanasis kamaningtsa.
 Siy Irusarinshuchis, ¿mayaamaja punirpatis tsiy-
 atchis?
 Wanasisiriri nuwaa kuki kamaningtsa.
 Napangtsa. Neewa. Apanll kuseenlltanda, tángtsa.
10 Apanll kizpureeru, tapachindamaam
 kusarangiya.
 Undararee wamari kasiyaru,
 waanaatsisha tiptsir itutseeru, ksutkiya.
11 Chinuzpan ashiru tiptsiree wanasis ksutkiya.
 Tputs opeejaa wip chipayaru, mangumunari
 chipaypaytar ashku wanasis ksutkiya.
 Opeej wipaa kaneeschiri tatsipkachu,
 wanasis ksutaru,
 ashiru Apanll iyaa Israelchicheetsini ksutchiya,
 waana Apanll siyaa tárangiya.

Nuw siyaa, ¡Apanll tamara! átana

12 ¿Chakaja musá kapungumashi, maree uwpatari
 táchich?
 ¿Chakaja kanindaatstam táchich?
 ¿Antaati kuwiptich tách tách ashkuch
 yasacheezich?
 ¿Chak mazachee tsaparunasush ichingaru táchka?
 ¿Chakaja machee íwar itsireeru kayxuyach?
13 ¿Chakaja Apanllee, Shiy ngichiktishcha, tách?

¿Chakaja Apanllee, Mangish pishtakcha; piy shingcha, týach?*

14 ¿Antaati Apanll chiyaa, Istanda. Mangeetsi p'tseengandama, táchéeja?

¿Nitaati chiy Apanllee, Nuw shiyaa kamankachuri, shiysha tputsee mangu itsinsarush yasangcha, táchéezich?

¿Chakaja Apanllee, Piy shingcha maachee tinakush, tárang?

¿Yapeeja Apanll pshtuyaru, yasasshee kizpur yasarang?

15 Apanll kandoozeewaa kung pakich xuwat xuwat ashishtar ashtar, ashiru pakiya.

Mazach tamapari ashiru pakich pakiya.

Kurakaw shaniykana, anoo mazacheetspaz ashiru kata kata ashkiya.

16 Apanlleem muchimaam ¿ndusha maachee pishtachiya?

Manginush ichingaru nachungayarush, maachee zapantaa muchta muchta ashkuch, Apanlleem wand pishtachiya.

Sumas zapantaa yarayaruch, Apanlleem muchkuch, nda waritachiya. Ashiritaa wand pishtachiya.

17 Tputs tsapurunasush ztaru waritarazinllinaja. Apanlleem nda pakchiyam waritakiya.

18 Na kamaningandama.

* **40:13** Yuwaa nish átu anootstam Romshucheema 11.34, misha 1 Koríndshucheema 2.16 tayusima kamankiya.

¿Chakpataja Apanll tatsamooth?
 ¿Yapeeja maachee yasin tinam yáyaruch, In watacha iy Aparini, táchich?
 19 Yasampan tputs ngusamb yáyaru,
 maachee tinayaru,
 orpa taparayaru,
 yarangasheem wayat wayat sheeru,
 kurikpat kateen tinayaru,*
 In watacha iy Aparini, mangu ngichkusin atanaya.
 20 Nduntaati ashiru, yasinaa nachungayaru,
 karipanaa pakeeru, tputsee kamachtakiya.
 Neewa. Nuwaam Apanlliri tinanda, tákchu,
 tputssha tinampan tinayaru, watseem mbam
 pashuchchiya, nda mangu pantsamaama.
 ¿Antaati an chiyaa istaku istacheeja? Nduni.

21 Mangeetsis p'tsichintspa.
 ¿Antaati siy nda yasarangis?
 ¿Antaati kitsis nda mazinarangis?
 ¿Ndusha zitamaris siyaa kamanirang?
 ¿Tsapurunasee pakus, ndusha chinakis yuwa
 Apanll waana tinarangu anootsee?
 22 ¿Apanll nishooja tsapush taak?
 Apanll watsirar kanindaa kánucha.
 Tsapush napku, chiyaa pchichpaz ashiru pakiya.
 Waana zandku, kanindaa kamis ashishisha
 wayakataraa ashchiya.
 Watambureempaz ashisha kamiran wayakuwa.
 23 Kurak kizpuritaa taaru, anoo kamiran
 kachingamaam taariya.

* **40:19** Tayaspatampani 17.29 tsiyatsis nipta tatsamooru taaritamta.

Tpachingakchu, ¿yapeeja yusur pangchich?

²⁴ Yuwat kaneeschiri kxuneeru,

Apanllsha tapuskachu, izuuru mawirukchiya.

Kambusur ashiru kambustakachu, yasin
yurangat, yurangat ashikpaz sheeru kurak
tsípachinllinanaya.

²⁵ Apanll siyaa mashkiya.

¿Chakpataja nuw waritachi?

¿Chakaja nuwapa tatsamooth?

²⁶ Kaapa kanindap napangtsa.

Amb nepeerush, ¿Chakaja kanindaa tinarang?
tángtsa.

Tsangacheetstam minu piyam wayat, piyam
wayat sheeru,

ichingaru an surunarangiya.

¿Antaati tsangach pantsacheeja? Nda.

Apanll waanpatari wizpur mbammari
wayarangiya.

²⁷ Ashirucha, nuw siyaa Israelchichis atashina.

¿Mayaamshtaja mangis mantsachis?

¿Mayaamsa ngutis átssa?

Apanll nuwaa mbizarangparee.

Apanll ndunpari nuwaa chinakiya.

Apanll nuwaam kapung pachindkuwa, átssa.

²⁸ Itaru, nuw siyaa atashina.

¿Ndusha tputs siyaa tayaspatarang?

Sirútari mazinarangpasa.

Apanll Taarashipan urutamari taarangiya.

Tsapurunasee ichingaru tinarangiya.

Maacheewaatstam ichingaru wayarangiya.

¿Antaati Apanll, Kanuschimasima, tárang?

Apanll wayasash iyapat nda waritariya.

29 Tputs wizpur pishtakinaariya, anoo tuwizpur-takiya.

Wanguytakinaariya, anoo yarkachu, támkiya.

30 Tputs kanungastaa nizkanaya.

Wanuts kapungtaa taaku, itaru wand pishtakiya.

31 Itaru, tputs Taarashipanimun mang' tatkinaariya,

wizpur ayamtaatiyam pishtacheeja.

Yunganpaz ashirusin kis naachinllinaya.

Kapungtaa iripkusin, ndusha kanusamaam zand-chinllinya.

Araptaa naakchusin, uru kis naachinllinaya,

Apanll átcha, tángcha, nuwaa tárangeiya.

Ashiriya, Mangoonangtsa, nuw Isáysi siyaa atina.

42

Mishat, nuw Apanllee wipunashee kamanch-intspa

1 Apanll ateeja:

Napangtsa. In watacha nuw ipunshi kizpuri.*

Nuw ipusaranguri, ksutkuri, kizpur wamun mangi kischa.*

Nuwaatsi kani ipunshishi tapshtuchima.

Ashkuri, uwsha tputsee mangoo ichingarootsin itsinsaru natstachiya.

2 Kizpur, Jay táchéeja.

Tsiyatku, ndusha zunganeechiya.

* **42:1** Romshucheema 1.1 tsiyatsis nipta tatsamooru taaritamta.

* **42:1** Matiwa 3.17; 17.5; Márkosa 1.11; Lukasa 3.22; 9.35 tsiyatsis nipta tatsamooru taaritamta.

Yaktash nduntam tamundachiya.

³ Watsiyunpa nda taachiya.

Tputsee iwatootspaz ipusamaatsi ashiru ndusha tzayaru kapeetchiya wanimaaamaya.

Nambarin achitamari tirooyaruch, kurakurtar ashtaru nuw tputsiri ndunsha ashtachiya.

Tputs kiyung kachiykana an ashikpaz ashiru, ndusha arangeem kiyung kachiychinllinaya.

Ashkachu, tatsamooru tputsee napchiya.*

⁴ Tputsee mangoo itsinsar yasachima, átu, nduntam kanusku, nduntam sambaytachiya.

Ashkachu, tputssha ichingarusin mapiyrsin taachinllinaya.

Arapich tputs marush kung arachich taakana, Antamsin mang' kis ipunshireetsi kuk mazinachinllinaya,

Apanll wipunashee tárangeiya.

⁵ Nuw Apanlli Taarashipani kanindaa tinaranguri, íwar kasarangina.

Tsapurunaseetstam tinaranguri, maacheetssha kanungkakaru wayarangitamti.

Tputseetstam kchitamaam shipush kanusarang-
ina.*

Nuwaana ichingaru tinarangina.

Nuw Apanlli ipunsheetsi tárangeiya.

* ^{42:3} Yuwaa nish átu anootstam Matiwa 12.18-20 kamankiya.

* ^{42:5} Tayaspataampani 17.24-25 tsiyatsis nipta tatsamooru taaritamta.

6 Nuw Taarshipantana siyaa, ipunshee,
ipusarangina.

Shiyaa kuwish putaranguri,
tputsee ichingaru tapachindampaneem
ínarangina.

Nuw shiyaa wayarangina.

Nuw Israelchichee yasapana aturi, tárangina.

Ashkachuri, tsapurunasshuch tputs nuwaa chi-
nachinllinaya.*

7 Tputsee wach mchusaa yarangcha, shiyaa atina.
Putamawaa tputsee tashitungangcha.

¿Mayaamaja tapish tumanam mangu taachinllina?

8 Nuw watatana Taarashipani. Watacha nuw su-
rina.

Nuw kizpur tputsireetsi pachindkina.

¿Antaati maacheetsi nllitaritaa, Watacha iy
Aparini, támama waritak? Nda.

¿Nitaati apanllputsee chinangtsa nuw tárangee?

Tputsee anumasheem, Watsta. Shirintspa, ati-
nawa.

Nuwaatsimari chinangtsa, atina.

9 Nuw sirú tárangi anoo ichingaru tuminarangina.
Nat in tsiyatsis kaneesich kamankina,
anoo zurampatari tuminchima.

Ndatuma parus, wasina nuw siyaa kamankuri
atashina,

Apanll tárangya wipunasheetsi.

Ashirucha, nuw Isáysi siyaa, Apanllee mangoo-
ngangtsa, atashina.

* **42:6** Lukasa 2.32; Tayaspamatampani 13.47 tsiyatsis nipta tat-
samooru taaritamta.

44

Apanll Taarashipan chiyaa nda kasakiya

¹ Apanll ateeja:

Siy Israelshuchis, nuwaa kuki mazinangtsa.

Siy Akoparinchichtischa.

Nuw siyaa tputsireemi ipusarangina.

² Nuw Taarashipantana. Nuw siyaa tinarangina.

Ndatuma nllurtachus,
nuw siyaa kayatak paz ashirangina.

Uru nuwtanda siyaa istaki.

³ Napa, nuw kungoo apusap tsap siyaam zaw
ashirangina.

Amb nduntaa kung pakchiyam taarangu,
ashiritaa wayarangina.

Na siyaam iparis kapung yusur istachima.

Taárasheemis kaneesich panakuri, kisshaparee
taatssa.

⁴ Chirichir kungumun wing kis kanungku,
misha karipan washitan wazanganamun kis ka-
nungku,

ashik paz ipareemis ashtachima.*

⁵ Anpursha tputs, Nuw Taarashipaneetsim chi-
nakina, táchinllinaya.

Nllitaritsha tputs, Akoparin tamaparee Apanl-
limun mang' taturangu, nuw ashkitamana,
táchiya.

Nllitaritsha uwimun yandashish yandachiya.

Apanll nuwaa kasicha, yandakchu táchiya.

An tputs uru Israela surunchiya,

Apanll siyaa átcha.

* ^{44:4} Wang 7.37-39; Apanll wanichu anu 22.1-2 tsiyatsis nipta tatsamooru taaritamta.

⁶ Apanlli Taarashipan siyaaam kurakcha.
 Uru siyaa Israelchicheetsis tapachindakiya.
 Wamari kasikiya.
 Waana Apanll siyaa átcha.

Nuw ichtakachuri taarangina.
 Nuw urutamari taaki antana.*
 Nuw minamari Apanlltana.
 Arang minamtiyam nuwapa waritarazinllinaja.
⁷ ¿Chakaja nuwapa tatsamooth?
 ¿Antaati tsiyatssee kaneesich yuw nuw nda yasari
 anoo kamancheeja?
 ¿Chak sirútamastaa nuwaa tuwacheeru,
 Piyparee ashtachiya, nuwaa tách?
 Tputs támaam wanindaja.
⁸ Nduntaa tputs ashim taaru,
 anoo punirintspa.
 Sambaytarintspa, nuw siyaa atashina.
 Sirútari, Nuw piy ashtachima, tárangeinawa.
 Zitaminaris nuwaa kuki mazinaranganaya.
 Siy ichingarus mazinarangitamsa.
 Nuwamari Apanlltana.
 Nllitarit Aparis wanindaja.
 Siyaa tapachindampaneem min nduncha.
 Nuw minamtiyam patareezi,

Apanll waana siyaa Israelchichis áttanda.
 Ashirucha, nuw Isáysi siyaa atashina.

⁹ Tputs apanllputsee tinakchu, anoo
 chinakchu, waritachazinllinaja. Apanllputseem
 wanasireewtaa tinayarusin, chiyaa pakchiyam

* **44:6** Apanll wanichu anu 1.17; 22.13 tsiyatsis nipta tatsamooru
 taaritamta.

nda istakanaya. Anoo ungirtakuch, mangshar ashkiya. Mirusinlltakana. Anoo stamaam waritakiya.

10 Tputs apanllputseem ngusambaa tinakchu, mangu ashkiya. ¿Antaati istamanaa istacheeja? nuw siyaa atashina.

Ashirucha, Apanlleetsimari Taarashipani chinangtsa, nuw siyaa atashina.

45

Apanll Taarashipan apanllputsee stakiya

20 Apanll ateeja:

Natu, shaniyeeni.

Israelchichis katuchimis tputsis, naani tsiyatsteeni.

Mazinangtsa. Tputs yasinaa yáyarusin, apanllputseem tinakchusin, shurangakataraa, kuktaraa ashkusin, mangsharit ashirusin chinakanaya.

Apanllputsee mashimashtar ashkusin, ¿mayaamaja ashkana?

Watam nda pakchiyam istaku tapachindachuwa, nuw siyaa atina.

21 Natu, siysat tsiyatangtsa. Kamaningandama.

Saanpatatis tsiyateerus, yasayarus, ¿amcheezis?

¿Chak yuw nuwaa tushiyru anoo wasina kamani-ranga?

¿Chak sirútamasa siyaa, Piy sheenlliya, átu kamani-ranga?

¿Ndusha nuw, Taarashipani, siyaa sirútari kamani-rangee?

¿Antaati apanllputs, kaniz ashiru, ashimaam war-itak?

Nuw minamariti siyaam Aparis taarina.

Nuwamari kasikuri, siyaa tapachindampani.

²² Ashirucha, nuwaa mashangandama.

Nuw siyaa kamiran tapachindachintspa; istach-intspa.

Araptaati taakus, yambtaa tsapurunas katuk-takatu ambitaa taakus,

ashiritaa nuw siyaa istachintspa.

Nuw Apanlltana. Arang min Apanll wanindaja.

²³ Yuwaa nuw tárangi anoo zurampatari tuminchima.

Nuw kuraki táranguri, ¿tamareeja pinaschee?

Nuwamari kasichuri, kundarareetsis kachingchima, táranginawa.

Kasikchuri, tputs ichingurusin nuwash kuseersin, tutunlltayarusin, nuwaa ungirtachinllinaya.

Nuwaa yasakchusin, zurampatari táchinllinaya.

²⁴ Taarashipaniri kizpur taakiya.

Wamari ichingaru tputsee kasikiya, táchinllinaya.

Tputs nuwaa niyrkana, anoo nuwsha stachprina.

²⁵ Israelchich tputs nuwamun kasichinllinaya.

Nuwaatsimari kis chinachinllinaya.

Watam kizpur tapachindachinawa Is-raelchicheetsi,

Apanll waana tárangiya.

Ashirucha, Apanllimunarisha mangis tatung-sha, nuw Isáysi siyaa atashina.

49

Apanll wipunash ztaru tputsee tuwasinichiya

¹ Nuw Apanll wipunashi atina:

Siy tputsis, yuwis arap arachich mar taakis anis,
yuwis tsapurunas yap katukatu amb taakis anis,
kaapa nuwaa kuki mazinangtsa.

Nduma nuw nllurtachuri,
Apanll Taarashipan nuwaa ipusarangiya.
Ataatash waxankan wand taaranguri,
Apanll nuwaa yásamarangiya.

² Nuwaa sundaroom ínarangiya.
Nuwaa kuki m'chit wawits ashiru wayarangiya.*
Nuwaa turuwpaz ashiru wayarangitamta.
Sheeru, uwpat nuwaa ksutarangu,
nuwaa purishpaz ashiru pshtarangiya.

³ Apanll waana nuwaa tárange:
Shiy nuwcha ipunshish.
Shiy uru nuwaa izuuru chinakush,
tputsirshitish nuwaa kis napchinlinaya,
tárange.

⁴ Nuwsha nllitarit chinarangitaati,
ashiritaa, Apanll nuwaa anoo tárange:
Nuw ngutariti kiyung kachiyarangina.
Kizpur apanllpan taarangitaati,
itaru, ngutariti Apanlee chinarangina,
nuwaanitari tárange:
Itaru, Taarashipansha waana nuwaa yasariya.

* **49:2** Utaáshucheema 4.12 tsiyatsis nipta tatsamooru taaritamta;
yuwaa nish átu anootstam Apanll wanichu anu 1.16 tayusima
kamankiya.

Yuwash waritaku anush Apanll nuwaa
 tuwapchiya,
 atina.

⁵ Waanasha Taarashipani nuwaa kis napchiya.
 Watam nuwaa tuwizpurtakuwa. Waana
 nuwaa wipunasheem ínaranguwa.
 Nuw aneershi waxankan taaruri,
 nuwaa ipusarangiyi.
 Shiysa ipunshee, Nuwaa tputsiri, Israelchichee
 mangoo p'tseengcha.
 Ashkachush, Akoparinchichsha yusur nuwaa chi-
 nchinllinaya,
 tárangeiya. Arang tárangitamta.

⁶ Nuw shiyya kizpur chinaktana.
 Arangeem nuwaa istangcha.
 Nuwaa tputsireetsi, Akoparineetsini mangoo
 p'tseekchush,
 Israelchichee katuchimarini nuwaa yusur man-
 goonkatssin,
 anush arangeem tsapurunasshuch ztaru tputs
 nuwaa mangoonchinllinaya.
 Nuwaa kuki tuwasineekchush,
 nuwsha tputsee arapcheetstaa tapachin-
 dachima.*
 Tsapurunas katuktakachu amb ichingarusin
 mazinachinllinaya,*
 Apanll nuwaa tárangeiya.

* **49:6** Lukasa 2.32; Wanga 8.12; Tayaspatampani 26.23 tsiyatsis
 nipta tatsamooru taaritamta. * **49:6** Tayaspatampani 13.47
 tsiyatsis nipta tatsamooru taaritamta.

⁷ Apanll Taarashipan siyaa Israelchichee itut-seeru, tapachindachiya.

Siy Israelchichis tsíparangitaatis, m'chachurtarangunts, kiyungtaa kachiyarangus, arapich tputs siyaa natsarangitaatssin, ashiritaa, Apanll siyaa chinaku, ateeja.

Tsapurunashuch kurak shiyyaa pakchusin, punirustakchusin, shiyyaa tutunlltachinllinaya.

Nuw Apanlli Taarashipani shiyyaa sirútari ipusaranguri, natsha in yuwaan tárange anoo shiyyaam tuminkina,

Apanll nuwaa wipunashi átcha.

Waana wipunashee ashkachu, ztaru tputsee tuwasineekchiya, nuw Isáysi siyaa atina.

Yakat Irusarinaa yusur wanásiritam panguchinllinaya

⁸ Apanll Taarashipan ateeja:

Nat in nuw Irusarinshuchee nayanimpatari istachima.

Nuw siyaa atashina:

Nat in nuw siyaa tapachindachintspa.

Nuw siyaa kapung istachintspa.*

Nuw siyaa tputsireemi ínarangunts, siyaa ksutaranguri,

na siysa yusur kissahaparee taatssa.

Watam nuw siyaa itsinsar tsiyataranguri, amikurtaranginawa.

Nimunari yuwaan tsapoo mantsarangana, anoo siysa yusur kis tarawaztatssa.

* **49:8** Yuwaan nish átu anootstam 2 Koríndshucheema 6.2 tayusima kamankiya.

9 Nuw ipunshi tputsee putamawaa tashitungachiya.

Tputsee yuw tapish taakana anoo, Yusur kis napangtsa, táchiya.

Ipunshi tputsireetsi wanasisr ksutchiya.

Katungtsee ngootsinung zapan pangchinllinaya.

Kung nduntaa sirú taarangu, ambiritaa opeejarineetsini kis martatssin, kungootstam yaschinllinaya.

10 Ipunshi tputsireetsi ksutkachu, marizimun ndusha kiyung kachiychinllinaya; kungoo waamaam nduntam pishtachiya.

Zar kizpurtaa zatku, kizpurtaa ksaneeku, ndusha kiyung kachiychinllinaya.

Amb kung zapan shitungataraa ashkachu, anoo ipunshi tputsireetsi yámandachiya.*

11 Mach kizpur íwartaa taaru, anoo ngootsee wanasisrsha tuwitchiya.

Wazawap tupareeyaru, tándaam ínachiya. Anush kamiran tputs naachinllinaya.

12 Napangcha. Tputsiri arapiritaa taaksin, yap zar yaku amb, yap zar puwachingaru ambtam, kizpur arap taakchusin, nuwsha amb yamayaruri, yusur Irusarinap wayachima, Taarashipan átcha.

13 Nuwsha, Isáysi siyaa atina:

* **49:10** Apanll wanichu anu 7.16-17 tsiyatsis nipta tatsamooru taaritamta.

Taarashipan waanaa tiptsiree tuwizpurtachiya.
 Nayanichu, yusur kiyung kachiyamaam, Watsta,
 táchiya.

Ashkachu, íwarpichis, mangis kis, Jay, jay tátssa.
 Tsapurunasshuchtis, shambatchitamsa.
 Yuwis machis taakis anis, shambatkus, Jay, jay,
 táchtamsa,
 nuw Isáysi siyaa atashina.

Apanll ateeja;

¹⁴ Siy Siyonshuchis tárangsa.

Taarashipani iyaa kapeetarangya.

Apanll iyaa mbizarangya, tárangsa.

¹⁵ Itaru, ¿antaati ashirang?

¿Antaati kiz wipaa mbizatar?

¿Ashinooja kiz wipaa chinamaam mbiztar?

Kizataa wipaa mbizakitaatiya,
 itaru, nuwsha Taarashipani, siyaa ayamtaatiya
 mbizacheezi.

¹⁶ Siyaa Israelshucheetsis suris kuwimuni yan-
 darangina.

Siyaa taarashis uru chinakina.

¹⁷ Ashirucha, sirú pangusee pátangampani
 kusarangtaatssin,

natsha pangoompan tputs yusur pangoomaam
 zapan mikeeru kuschinllinaya.

Pátangamapan tputs sirútari suwaranganaya.

¹⁸ Ashiriya, napangtsa. Nashamangantsa.

Tputs ¿wanipamasaja Irusarinap naakchusin,
 siyash musá shaniychinllina?

Nuwsha Taarashipani zurampatari atashina.

Ndunnaa k'keetsi tuminkuri, tsipachshaparina nuwaya.

Ashiriya, mazinangtsa.

Yusur kis taatssa.

Yarangasheetsis yusur yarareerus, kis yupzingambeerus, taatssa.

19 Tsapuneetsis kapeetarangitaatssin, pangeetsis tunuparangtaatssin, maachiritaatsis shuchirangitaatssin, ashiritaa, siysa yusur izapaneekchus, tsapunis tatsitkachus, tsapuneemis pishtachshapree.

Watam kundararis arap suwasuwaranganawa.

20 Siyachich nlluranuris arap suwarangitaatssin, yusur kitsishis tsiyatchinllina.

Iyaam tsapoonni pishtakiya.

Tsapuneemani arang wayangasindama, táchinllinaya.

21 Itaru, siysa mangishis tátssa,

¿Chak nee ipareemi panaranga?

Watam ipari ndunaramunawa.

¿Antaati nuw iparinarangee?

Nuw arapari taaranguri, zaranli nduntam taarangiya.

Ashiriya, ¿chak, Neewa ipareemish, nuwaatáranga?

Nuw minamariti apusap suwaruri taaranguri,

¿yapamasaja ipareemi shitungarang?

siysa Irusarinshuchis tátssa.

22 Itaru, Apanll Taarashipansha siyaa ateeja;

Nuwsha tsapurunasshuchee tputs kamachtachima.

Tputssha ichingarusin nuwaa wizpuriri
pakchusin, punirustachinllinaya.

Anoo pakchusin, Israelchichee pachipeersin,
yusur watsapunish wayachinllinaya.

Kizaa nllura kuyarusin, yusur wayachinllinaya.

²³ Tsapurunasshuch urkar siyaa wapareepaz
ashiru ínachinllinaya.

Kurak wizanllin siyaam ksutamapaneem taachin-
llinaya.

Uwshtisin siyaa kapung chinaksin,
tsapush siyanung tutunlltayarusin,
tsapoo iput iput ashchinllinaya.

Ashkatssin, siysa nuwaa, Taarashipaneetsi man-
goonatssa.

Tputssha nuwamun mang' tatkusin,
Ayamtaati nuw siyaa ngichcheezi,
Apanll siyaa Irusarinshucheetsis átcha.

²⁴ Kaapa mangishis itsinsar chinangtsa.

Kizpur kurak taaru,
¿antaati anoo maacheetsi itutsimaam waritak?

Tputspa waratkachu, kasichu, ¿tamareeja chiy wat-
sta táchich?

Mishat, ¿antaati putamaw tputs tumaneersin shi-
tungeecheeja?

mangeetsis p'tseekuri atashina.

²⁵ Itaru, Apanll Taarashipansha siyaa ateeja;
Nuwsha kizpureeruri, piy ashtachintspa.

Kurak tputspa waratkachu, maachee itutskachi-
taatiya,

ashiritaa nuwamarisha kasikastachima.

Tputs siyaa natsakchusin, mantsirita
 tsiyatkusin,
 ashiritaa, nuwsha ipareetsis tapachindachima.
²⁶ Ashkachuri, yuw siyaa kiyung yacharangana,
 ansha tputs paziksin, nuw waneekchuri,
 waanaatsee wanuts kamu kamu
 ashchinllinaya.
 Waanaatstaatam ursir waakchusin, vinumunpaz
 ashiru karuschinllinaya.
 Sheeruri, tsapurunashuch ztaru tputs nuwaa
 yasachinllinaya.
 Paja. Apanll Taarashipan wamari Israelchichee
 tapachindakuwa.
 Wamari Apanll Akoparinchichee itutskuwa,
 táchinllinaya, tsapurunashuch tputsi, nuw Isáysi
 siyaa atina.

50

Saanamun yutaritshish Apanll siyaa kizpur wa-neerangiya

¹ Apanll waana ateeja.
 ¿Antaati nuw siyaa Israelchicheetsis tputs kizaa
 kasataru, sheeruri kasarangee? Nda.
 Tputs wizanlee natsaku, kapeetaru, ¿antaati nuw
 siyaa ashirangeezi?
 Saantari nuwaa ngatarangus, nuwaa kuki ndun-
 tam mazinarangus,
 nuw siyaa anumand arap kapeetarangina.
 ¿Nitaati nuw siyaa tputsireem muchchuri tupax-
 anxarangee? Nda.
 ¿Mayaamaja nuw siyaa tupaxanxachee?

¿Antaati nuw tputseem tumashtakinawa, kurik
putapi aturi, siyaa tupaxanxapi?

Saanamandari yutaritshishiris saanaatsis
tumuchchurtarangsa.

² Nuw siyash kusaranguri, naparanguri,
minamtiyam tputsee nda parangina.

Nuw siyaa kapung kuruzaranguri, minamtiyam
nda ¡Maya! siy tárangsa.

Itaru, siy nuwaa, ¿Antaati Apanll iyaa istacheeja?
tárangsa.

¿Nitaati Apanll kundarareetsini iyaa itutsimaam
waritcheeja? tárangsa.

Nuw kizpurtana. Minamari nuw tsiyatkachuri,
musá kapungu, Puzangi tákchuri, puzataraa ash-
tachiya.

Kung imuritaa kamiran puzachiya.

Ashkachu, kayupichsha ichinguru tsipachinlli-
naya.

Kung nduneekchu, mangu kayupich tsipayarusin,
kuchachinllinaya

³ Nuw kamachtakuri,
kanind kantseerpipitaraa, sheeru, sin sinakchu,
tputs tsiparingaz tanuku sur xuwat xuwat
ashtaru ashtachiya.

¿Chakaja nuwapa waritak?
átcha Apanllee.

Ashiriya, saanamandari yutaritshishiris Apanll
siyaa waneekiya, nuw siyaa atina.

*Apanlee wipunash kizpuritaa kiyung
yachakusin, uru Apanllimun mang' tatkiya*

Apanll wipunash átcha:

⁴ Apanll Taarashipan nuwaa tayaspatarangiya.

Tayaspatarangu, tputs kizpur nizkitaa,
 nuwsha apinll tsiyatkuri, mangoo isitchichina.
 Zar taraseekchu, Apanll nuwaa ituyamachu,
 kis támkachuri, kukoo kamiran nuw mazinakina.

⁵ Apanll nuwaam mangeemi putit panarangiya.
 Nuw Apanllee kuk pakchiyam nda kapeetkina.
 Nuw Apanllee kushtarangeezi.

⁶ Itaru, nuw kamiran kushtarangina, kundarari
 nuwaa kushi pzkoomaama.
 Kundararshiti nuwaa susi xputa xputa ashiran-
 ganaya.

¿Antaati nuw ksimumarangeezi? Nuwash kachi
 kawachta, kawachta ashiranganaya.*

Nuwaa kizpuritaa yutarit tsiyatarangsin, nuwsha
 zamaruri mazinazinaw ashirangina.

⁷ Apanllimari Taarashipan nuwaam istarangiya.
 Anumun nuwaa aranginasha mantsir
 tsiyataranganaya.
 Nuw patumbichpaz ashiruri, nda pakchiyam
 pazirangina.

Ayamtaa Apanll nuwaa tapachindakchu, ndun-
 shaparee pazichina.

⁸ Waana Apanll nuwaa tapachindachiya.
 ¿Chakaja nuwaa kasiku kasich? Zapishtsha
 nuwsha, Natunaa, kurakap nuwaa, Naani, táyarus,
 nuwaa yutarit tsiyatangandama, táchima.
 ¿Chakaja nuwaa yutarit tsiyatku tsiyatach?
 Mishat, ¿chakaja nuwaa kasiku kasich?
 Wandaya tputs nuwaa yutarit tsiyatamaam taari-
 naariya,
 waani nuwaa yutarit ínachindama.

* **50:6** Matiwa 26.67; Márkosa 14.65 tsiyatsis nipta tatsamooru taaritamta.

9 Apanllimari Taarashipan nuwaam istamapa-neem taakiya.

Ashirucha, ¿chakaja nuwaa yutaritaam ínachinda?
Nuw kundarari tsípakchusin, zaputaru taachinllinaya.

Ndunichshaparee.

Chirik' kucharpaz ashiru ndunichiya,*
Apanll wipunash tárangeiya.

Ashiriya, Apanlee wipunash kizpuritaa kiyung yachaksin, uru Apanllimun mang' tatkiya, nuw siyaa atina.

52

Waana Apanll Irusarinshuchee itutschiya

Apanll ateja:

1 Siyonshuchis, támangints. Kizpurtangints.

Irusarinshuchis, kamaris kizpur wanasis kamar-tangints.

Siy apanlpantischa. Ashiriya, shambatangints.
Arapich tputs ayamtaati siyash yusur tamundac-hazinllinaya.

Uwshtisin Apanlee ngatamapaniri taakanaya.
Kizpur yutaritshishee chinakanaya.

2 Irusarinshuchis, chiyzangints. Tsarunaa kpitangints.

Kurakamun watsirar k'xinartangints.
Siyonshuchis kizis kamasinis siyaa tumanirangi-taatssin,
ashiritaa yuwaa kayak chiparis anoo kpitangints,
Apanll siyaa Irusarinshuchis tárangeiya.

* **50:9** Romshucheema 8.33-34 tsiyatsis nipta tatsamooru taaritamta.

3 Apanll ateeja:

Arapich tputs siyaa muchchureem putarangusin,
nuwaa itutsirangsin, nuwaamsha nda pakchiyam
tuwaparanganaya.

Anumun na siyaa yanpukchuri, siyaa
itutskachuri,
uwaam nduntam pakchiyam tuwapchina.

4 Napa: sirútamasa siy Ijiptop naatarangus,
anush arapich tputs tamatarparee ashiru
taarañsa.

Anumunsha, Asiriyshuch tputs siyaa mangutari
kiyung yacharanganaya.

5 Naachsha, ¿kamaparee arapich tputs siyaa kiyung
yachachiya?

Mangutaritam yaktap Babiloniyp siyaa puta-
yarusin, machiranganaya.

Amb kusarangus, siyaa kiyung yachakanaya.

Kurakaam ínaksin, kizpur, ijay! ijay! atanaya.

Ashkusin, nuwaa tutsiyuntaranganaya.

6 Yuwash zar waritakchu anush, nuwsha siya-
mand kisatakchuri,

siy nuw tputsiris nuwaa, Apanll Taarashipancha.

Apanll waanaatsi kuk uru payukiya, nuwaa
táchpasa.

7 Tputs tsiyatssee wanásirimshee machip
wayakchusin,

machshuchsha tputs anoo mazinakchusin,
mang' shambatchinllinaya.

Watam, Apanll siyaa tapachindaranguwa.

Na ndusha siyaa m'chachurtachintsá, átcha.

Na mapiyrus taangtsa, atiya.*
 Siyonshucheetsis, Apanll siyaa kurakcha,
 táchshaparee.

⁸ ¡Mazinangantsa! Sundarshat tsangampani kizpur,
 ¡Napangtsa!

¿Kamaparee Apanll Taarashipan waana Siyonash
 kuschiya? táchpasinaya.

⁹ Kizpur shambatangtsa. ¡Jay! ¡Jay! tángtsa.
 Watam siyamari kasitssawa.

Apanll Taarashipan siyaa, waanaatsi tiptsiree
 nayinirangu,
 kundarareetsis itutsirangiya.
 Irusarinshuchis kisshapari taatssa.

Na ndushaparee siyaa m'chachurtachintsa.
 Irusarinshuch pang' ichingaru yurangarangitaa,
 ashiritaa shambatangtsa.

¹⁰ Apanll Taarashipan kizpureeru,
 tsapurunasshuch tputs ichingarusin wach parsin,
 ichingarusin yasachhpasinaya.

Waana Apanll iyaa Utaáchcheetsini tapachin-
 dachiya.

¹¹ Ashirucha, nuw siyaa, ¡Shtungangints! Yaktash
 Babiloniaya ksangtsa.
 Maachee yutaritshish ptatintspa.
 ¡Mikintsa! Babiloniaya izuuru ksangtsa.
 ¡Yutaritshishee pakchiyam chinarintspa;
 ptatintspa!*

Apanllee maachirit yáyarush,
 waptam Apanllip pang' chipayarus, wayangtsa.

* **52:7** Yuwaan nish átu anootstam Romshucheema 10.15 tayusima
 kamankiya, misha Ipísshucheema 6.15 tsiyatsis nipta tatsamooru
 taaritamta. * **52:11** 2 Koríndshucheema 6.17 tsiyatsis nipta tat-
 samooru taaritamta.

12 Shitungachus, suwamari suwacheezis;
apinll mapiyrus naatssa.
Watam Taarashipansha, siy Apanlliris, kizpur
siyaa napchuwa,
Apanll Irusarinshuchee tárangiya.
Ashiriya, Waana Apanll Irusarinshuchee
itutschiya, nuw siyaa atina.

*Apanllsha wipunash kizpur kiyung kachiyeeru,
anumun wamari kasichiya*

Apanll ateeja:
13 Ayam nuw ipunshi ichingaru wanasir shi-
tungchiya.
Apanll kizpur kurakaam ínachiya.
Tputs ichingarusin waa chinachinllinaya.
14 Ichtaru, nuw ipunshi kizpur kiyung kachi-
yarangu,
wanutsee pzkooksin, tpit tpit ashirangsin,
wachsha nda tputs ashiru parangusin,
tsapurunasshuch tputs ichingarusin kapung
punirustaranganaya.
15 Itaru, natsha ashiritam, ichingarusin yusur
punirustachinllinaya.

¿Tamara Apanll wipunash? táchpasinaya.
Kuraksha Apanllee wipunashi pakchusin,
mangu nda tsiyatkusin, zaputaraa ashchinlli-
naya.
Pakchusin, mangoonachpasinaya.
Nduntaa sirú anoo mazinamaam zandarangusin,
natsha kizpur wanasirmshee mazinachinlli-
naya,*

* **52:15** Yuwaan nish átu anoostam Romshuchcheema 15.21
tayusima kamankiya.

Apanll tárangeya wipunasheetsiya.

53

Itaru, nuwsha Isáysi Apanllee wipunashi siyaa kamanchintspa.

¹ Kitsiptini mazinarangini, anoo kamankuri, tputssha anoo k'kuz mangoonamaam nda zand-kanaya.*

Apanllsha Taarashipan wizpuree yámandarangu, ¿chakaja anoo mangoonach?*

² Apanllsha wipunash Apanllee kukoo payumpan-imuncha.

Tsap puzamunpaz ashiru kxoonarangya.

Wachsha mantsireem ínarangusin, ¿chakaja waa kis napach?

¿Antaati waa kurakaam ínacheezich? Nda.

³ Atusin, tputshitisin Apanllee wipunash nda kis naparusin,

zurampatari ngataranganaya.

Apanllsha wipunash kizpur kiyung kachiyarangiya.

Urutari kiyung kachiyku taarangya.

¿Antaati kis pamaam waritak? Nda.

Iy tputsini niyraranguni,

¿Antaati in waritak? táranginiya.

⁴ Itaru, iyamand wásuree, Ay, tárangeya.*

Iysha, Apanll waana nee tputsee waneekiya.

Waana zandarangu, kiyung yachakiya, tárangtanicha.

* ^{53:1} Yuwaa nish átu anootstam Romshucheema 10.16 tayusima kamankiya. * ^{53:1} Yuwaa nish átu anootstam Wanga 12.38 tayusima kamankiya. * ^{53:4} Matiwa 8.17 tsiyatsis nipta tatsamooru taaritamta.

5 Tárangitaatini, itaru iyamand yutaritshishini
kiyung kachiyarangiya.

Yuwamand iy Apanlee kuku nda payurangini
anumand mangoo kayungaranganaya.

Anumunsha, Apanll iyaa yutaritshishee
mapiykiya.

Yuwamand kiyung kachiyarangu, anumand iyaa
wanasirimsheem wayarangiya.*

6 Itaru, iysha opeej tamaparee ashiruni
mantsirish masaru taaranguni,*
yuwari yaana zandkini anuri mapiyruni yutarit
taarangini.

Itaru, Taarashipansha iyamand yutaritshishirini
wipunashee yutaritaam ínarangiya.

7 Kizpuritaa kiyung yacharangsin,
ashiritaa muxarpaz ashiru kamiyarangiya.
Zaputaraa ashirangiya.

Opeejaatspaz ashirusin pachamaam
machtarangusin,*
nda pakchiyam yámarangiya.

Mishat, opeeja pur kumaksin, nda pakchiyam
yamtaru ashirangiya.

8 Nda tsiyatssee yaramaam zandarangsin,
yutaritap machtaranganaya.

Minamtiyam tputs, In wanasircha.

¿Mayaamaja kiyung yachamaam zandchich? nda
tárange.

¿Chakaja, Nee tputs yutaritaam ínarintspa, tách?

* 53:5 1 Pitoru 2.24 tsiyatssis nipta tatsamooru taaritamta. * 53:6

1 Pitoru 2.25 tsiyatssis nipta tatsamooru taaritamta. * 53:7 Apanll
wanichu anu 5.6 tsiyatssis nipta tatsamooru taaritamta.

taárashee izuuru kanatsipamamari
 machtarangana.
Apanllimand tiptsiri yutaritshishirini
 pacharanganaya.*

⁹ Sheersin, wanutsee mapurangusin,
yutaritshishpanpa tputs washunand
wayaranganaya.
Uw yutaritshishirinee ndunarimuntaa,
kuk nduntam minamtiyam tsiyatarangu,*
ashiritaa mangu pacharanganaya.

10 Taarashipansha waana wipunashee kiyung
yachamaam zandarangiya.
Wipunashsha tputsimand yutaritshishirinee
tuwapamaam waana zandarangu,
ashirangiya.

Itaru, zapshinaa urutamari taachiya.

Waanaa tiptsiri yusur kis pangchiya.

Yuwamand ashirangu anumand Apanllsha tiptsir
kukoo kis payuchinllinaya.

11 Apanllsha wipunash kapung kiyung kachiyaru,
anumunsha yusur támmeeru, kis 'sinish taachiya.
Ashkachu, mang' kis taachiya.
Taarashinen wipunash war asirimahinen tputace.

Taarashipan wipunash wanasisrimshipan tputsee
zapan tapachindachiya.
Watawutapachindachiyah

Watam tputsimand yutaritshish waana tuwa-paranguwa.

¹² Anumunsha, Apanll wipunashee kizpur kurakaam inachiya.

* 53:8 Yuwaa nish átu anootstam Tayaspamatpani 8.32-33
tayusima kamankiya. * 53:9 1 Pitoru 2.22 tsiyatsis nipta
tatsamooru taaritamta.

Wamari kasiru, taachiya. Itaru, kurak nllitaritsha
ningach taachinllinaya.
Kizpur shambatchiya.
Watam waanaatsi watsipun nda pachin-
daranguwa.
Yutaritshishpaneempaz ashirusin, wa-
yaranganawa.*
Itaru, ¿mangutaja ashirang?
Watam ichingaru tputseem yutaritshishirineem
tuwaparanguwa.
Apanll tputseemanı ashirangiya,
Anoo nuw Isáysi Apanlee wipunashee kamank-
ina.

54

Apanll urutari tiptsiree chinakiya

¹ Siy Irusarinshuchis, kiz mipish tamaparee
ashirus taarangsa.
Tputsiris ndunari; iparis ndunarpaz ashiru
taarangsa.
Natunaa, kizpur shambatangtsa.
Mangis kis, Jay, jay, tángtsa.
Watam Apanll Taarashipan atuwa.
Kasamawtaa kiz wip zapan taachiya.
Wamari kasichiya yuw wazaranll taaru anootsi,*
atiya.

² Pangeetsis aranginasha yápungangtsa.
Mapiyrus pangeemis tambtatssa.
Mbamari pashuchutssa.

* **53:12** Lukasa 22.37 tsiyatsis nipta tatsamooru taaritamta.

* **54:1** Yuwaa nish átu anootstam Gálatasshcheema 4.27 tayusima
kamankiya.

Maachiritish zapan anush taachiya.

³ Watam siy tputsiris zapan taachuwa.

Ningich watandaram taaksin, arangeemsha
watandaram taachtamanaya.

Siyachich shitungeersin, wamari arapchee tputs
kasichinllinaya.

Tputsee watsapun itutseersin, anushsha taachin-
llinaya.

⁴ Pzirintspa, watam mapiyrus taatssawa.

Minamtiyam tputs siyaa mantsir tsiyatchazinlli-
naja.

Siyaa tpazamaam ndunshaparee.

Sirú kiz mashind ashirus taarangus, pazirpatis
taarangus,

itaru natunaa, anoo chinacheezis.

⁵ Tsapurunassee tinampansha siyaa chinaku,
siyaa wizanlleempaz ashiru yamayaru,
siysa anush kisa taatssa.

Uw kizpurcha. Apanll Taarashipancha.

Siyaa tapachindampancha.

Tsapurunassee zurampatari ksutkiya.

Apanlliritcha. Yuwartatam zitamaris Israelar-
ini chinarangu anuritamcha.

⁶ Siysa kiz kamasin kasam ashirus
kapung kiyung kachiyarangsa.

Itaru, Apanllsha siyaa yusur kuruzeeru,
siyaa átcha.

⁷ Nuw siyaa natumasaam kasarangina.

Itaru natsha, nuw siyaa kapung nayanikuri,
yusur nuwapat kis taatssa.

⁸ Nuw kapung tsiyantaranguri,
natumasam siyaa suwayaruri, tapishurangina.

Ashirangtaati, itaru nuw siyaa uru chinarangina.
 Nuw siyaa kizpur nayanikina,
 Apanll Taarashipan siyaa átcha,
 watam siyaa tapachindampanawa.

⁹ Apanll ateeja:

Sirútama yuwapur nuw tsapurunasee kungupat
 waneerangi,
 anpursha nuw zurampatari Nowerineetsi
 tárangina. Ayamtaatiya Yusur kungupat
 nuw wanicheezi, tárangina.

Natsha nuw siyaa zurampatartatam atashina.

Ayamtaatiya Yusur nuw siyaa kiyung
 yachacheezi.

Mishat, siyaa mantsir tsiyatcheezi.

¹⁰ Mach íwar nllitaritap naanataraa ashkach-
taatiya,

tsapush pantsaktaatiya,
 ashiritaa nuw siyaa uru chinachina.

Nuw siyapa amikurtaranguri,
 siyaam mapiyshish uru panachintspa, táranguri,
 nuwaanaatsi kuki uru tuminchima.

Nuw siyaa uru nayanikina,

Apanll Taarashipan siyaa Irusarinshuchis áttanda.

Yaktaa Irusarina Yusur kaneesich panguchima,
Apanll átcha

Apanll ateeja:

¹¹ Siyaa yaktaris pangis yurangamaa.

Sin sinaku, kambusur kizpur kambustaku,
 pangeetsis kapeetataraa ashirangu,
 siy yuwapur kiyung kachiyarangis,
 anpur minamtiyam tputs siyaa istarangeeja.

Wayanut siy ashirangtaateesa, natsha nuw siyaa
uru istachintspa.

Patumbichpa kawambananamashpa pangeemis
panguchima.

Patumbich mbammashish chumbeepamashish
pangis taatssa.

¹² Torre tsangampaneemsha chumbeepamash-
tam pashuchchima.

Patumbichpat kurakurtaru anpat yaktareetsis
tandapunuyaruri, íwar iturpichima.

Washtangashsha zar tamapari ashiru tuwasiniru
taachiya.*

¹³ Anush taakchus, nuwaana ipareetsis tayaspat-
achima.*

Ashkachuri, anush iparshitis uru kis taachinlli-
naya.

¹⁴ Siysa tsiyatsis mantsirmshee itsinsaru
yasakus,
kizpursha taatssa.

Ayamtaati tputs siyaa kiyung yachachazichinlli-
naja.

Siy ndusha punitssa.

Yutaritshishsha siyash ayamamtiyam yusur nda
tushiychiya.

¹⁵ Tputs siyapa waratamaam zandkitaatiya,
nda nuwamand xarashish siyaa waratchinlli-
naya.

Ashiritaa, siyamari kasitssa,
Apanll siyaa átcha.

* ^{54:12} Apanll wanichu anu 21.18-21 tsiyatsis nipta tatsamooru
taaritamta. * ^{54:13} Wanga 6.45 tsiyatsis nipta tatsamooru
taaritamta.

16 Napangcha. Nuwaana tputsireetsi ngusambamsheem ínarangina.

Tputs ngusambaa sumasish kizpur ksaneeyaru, maachee ichingaru waratamaam tinakiya.

Nuwaantatam tputsee pachampaneem ínarangina.

¿Chakaja uwapat waritaku waritach?

17 Kizpuritaa taaksin,

siyatssha kasimaam wanindaja.

Tputs siyaa yutaritaam ínakaatssin,

ashiritaa siysa yámkus, zamaru taachinllinaya.

Tputs uru nuwaa chinakchusin,

nuwaa kuki payukchusin,

nuwsha anoo tputsee istakchuri,

urutamari wamari kasichinllinaya,

Apanll Taarashipan zurampatari siyaa átcha.

55

Apanll uru shiyaa zandkiya

Apanll shiyaa átcha.

1 Neewa. Shiy sachitkush, nuwash waangcha.*

Kurikirish nduntaa payurush, ashiritaa, Neewa, atina.

Nuwaa mashkush, nuwsha ngutiriti istachinllpa.

Kis waangcha. Ksatam ktungangcha.

¿Antaati anumand nuw, Tuwapanda táchheezi?
Ndambari.

¿Mayaamaja shiy ngutish kurikee katungtsimand
kucharimand kpunimand itsanchish?

¿Mayaamaja kurikingaz zapan zaree tarawuz-takush,
kiyung kachiykush,

* **55:1** Wangá 7.37-38; Apanll wanichu anu 21.6; 22.17 tsiyatsis nipta tatsamooru taaritamta.

katungtseem kapungtaa kapeetkush,
 ashiritaa nda tazazarush taachsha?
 Nuwaa kuki kaapaniri mazinangcha.
 Nuwaa mashkush, nuw shiyaa wanasis istachin-
 llpa.

Tazazapaz ashirush, kis taatsha.

Katungtseempaz ashiru kis katungatsha.

³ Nuwaa mashkinaareesha, nuwaa kuki mazi-
 nakinaareesha,
 kisshaparee taatsha,
 zurampatari nuw shiyaa atashina.
 Nuw shiyapa tsiyatssee yarkachuri,
 shiyapa amikurtakchuri,
 zurampatari nuwaanaatsi kuki tuminchima.
 Amb ashkachuri, Dapiyarinimand chinakuri,
 nuw kuki Dapiyarinpatsatsamchima.*

⁴ Sirú nuw arapchee tputs, Dapiyaa napangtsa.

¿Waninll chinakinawa? tárangina.

Dapiyamand tputs ichingarusin nuwaa
 chinachinllinaya.
 Dapiy ztaroo tputsee wamari kasiriya,
 táranginawa.

⁵ Dapiychich arapchee tputs kuruzkiya.
 Nduntaa wach parangu,
 nduntaa Dapiyarinichichee yasarangusin,
 ashiritaa Dapiyap iripuptaraa ashchinllinaya.
 Nuw Taarashipaneeruri, Israelchichee
 Apanllirini taakuri,

Dapiyarinchichee kizpur kurakaam ínachima,
 Apanll Dapiyarinchichee átcha.

* **55:3** Tayaspatampani 13.34 tsiyatsis nipta tatsamooru taaritamta.

Nuwsha Isáysi siyaa atashina.

⁶ Mikeerus Taarashipanee nachungangtsa.

Ndatuma tsípachu, chinangtsa.

Nduma arap naachu, kuruzeeru, Apaa, tángtsa.

⁷ Yutaritshishpanis, yutaritshireetsis izuuru
kasayarus, Apanllee mangoonangtsa.

Kitsis mitsshartawis mantsir chinarintspa.

Apanllee yusur chinangtsa.

Ashkachinaareesa, siyaa nayinichintsa.

Siyaa mangeetsis yarchiya.

Yutaritshireetsis ichingaru mbizachiya,

watam siyaa kizpur chinakuwa,

nuw siyaa atashina.

Apanll waana ateeja:

⁸⁻⁹ Siy nuwapa chinashi nda waritaksa.

Yuwari nuw zandki, nuwsha anuri ashtachima.

Pzitamaam nuw yasareezi. ¿Antaati nuw tput-
seezi?

Napa: kanind kizpur tsapoo kánuruwa.

Nuwsha ashiritamti shiyya kánuritamti.

Apanlleeruri siyaa kasirina,

Apanll siyaa átcha.

¹⁰ Sin kamaparee,

kanindap pantsakchu,

tsapush zaw shitaranllu, kachachtakchu,

maacheetsi ichingaru yanungakchu,

anootssha siysa kis katungkachpasa.*

¿Antaati sin waptam kanindpitam kanapcheeja?

Nda.

* **55:10** 2 Koríndshucheema 9.10 tsiyatsis nipta tatsamooru taaritamta.

11 Nuw tsiyatkuri, sin ashiru kuki tsiyatkina.
 Kuki tsiyatkuri, tputsee istakiya.
 Kamachtakuri, tputssha anuritam payukanaya.
 Nuw ngutariti nda tsiyatkina.
 Nuwaanaatsi kuki zurampatari payukina.

Nuw Apanlli siyaa atashina.
12 Siynaa na araptaa taakus,
 nuwsha siyaa tashitungakchuri,
 shamangarush naatssa.
 Mapiyrus pangipis kanaputssa.
 Siyamari mangis kis taatssa.
 Mishat, machsha íwar shambatchinllinaya;
 yaseekpaz ashchinllinaya.
 Uw tuwat tuwat ashikpaz ashchinllinaya.
13 Kapsha ndusha mzatsish karutachiya.
 Karipan kisshapari kxunchiya.
 Karipan taakchu,
 simbunsha ksatam kanungchiya.
 Ashkachuri, tputs ichingarusin nuwaa, Taara-
 shipaneetsi, yasachinllinaya.
 Nuwaa chinachinllinaya.
 Urutamari nuwaa mangoonachshapsinaya,
 Apanll Taarashipan, Zurampatari nuw siyaa
 zandkina, tárangiya.

56

*Siy Apanlleetsimari kuk payukus, Apanllsha
 siyaa kis napchintsa*

Apanll ateeja:
6 Arapich tputs, kandoozeew nuwaatsimari kuki
 payukchusin,
 nuwaatsimari chinakchusin,

nuwsha tputsireemi ínachima.
 Zar kanusishshee ndunnaa yankusin,
 kis anush kanuskusin,
 yuwaa tárange anoo ndunnaa kapeetkusin,
⁷ nuwsha kis napkuri,
 machip Irusarinap machchima.
 Anush, nuwash pangí kis nuwapa tsiyatchinlli-
 naya.
 Mashkusin, nuwsha kis mazinachina.
 Maacheetsi sumasimun muchkusin,
 anoo kisshaparee nuw napchima.
 Watam ztaru tputseem shaniymaam nuw pangí
 taaruwa.
 Anush kandoozeew ichingarusin nuwaa
 tsiyatchinllinaya.*
⁸ Tputs arap pseertarangitaatssin,
 nuwsha pangipi anoo tputs machchina.
 Nllitaritap tputs watsapun taarangtaatssin,
 nuwashsha shaniychinllinaya.
 Nuw tputsireetsi Israelchichee ashchitamana.
 Araptaa pseertarangusin,
 nuwsha yamayaruri,
 nuwashsha kis napchinllinaya,
 Apanll Taarashipan siyaa tárangiya.

Ashirucha, nuw Isáysi siyaa, Apanlleetsimari
 kuk payukus, Apanllsha siyaa kis napchintsa,
 atina.

* **56:7** Matiwa 21.13; Márkosa 11.17; Lukasa 19.46 tsiyatsis nipta tatsamooru taaritamta.

58

*Zurampatari nuwaa mangoomaam piy shingcha, Apanll átcha**

- ¹ Apanll Taarashipan nuwaa tárangiya.
 Kizpur tsiyatangcha. Pzirinllpa.
 Wakar wits tamaparee ashiru kapung zunga-neengcha.
 Nuwaa tputsiri waneengcha, watam yutarit taakanawa.
 Akoparinchich tputs yutaritshishee kis chinakanaya.
- ² Uru nuwaa mangutari chinamanaa chinakanaya.
 Mishat, nuwaa yandamari mangutaritam uwish kis payukanaya.
 Kamachmareetsi kizpur payupani mangu atanaya.
 Nuwaa, Itsinsar iyaa Apanll yasachpa, mangu atanaya.
 Nuwash pangí kis pshtukanaya, nuwapa tsiyata-maama. Itaru, mangu ashkanaya.
- ³ Nuwaa atanaya:
 ¿Mayaamaja katungtsee ngutich manguchich?
 ¿Watom Apanll nda chiyaa pakuwa?
 ¿Mayaamaja Apanlleem mangukuch, ngutich kiyung kachiychich?
 ¿Antaati Apanll yuwaa chiy manguchich anoo pakkeeru, chiyaa chinacheeja? átssa siya.
 Itaru, nuw Apanlli siyaa atina.
 Zaree mangumaam nuw siyaam wayarangitaati, itaru siysa anush zar nda wanasis taaksa.

* **58:** Matiwa 6.16-18 tsiyatsis nipta tatsamooru taaritamta.

Anush zar ngutis paxanxatangat ashiksa.
Tputsee tupatangakus, nduntam tatsamooru
tuwapaksa.

⁴ Saanpatatis natsatangat ashkus,
waratatangat ashiksa.

Muchoo putayarus, tiyá tiyá ashkus,
mangushishsha zar nuwaa mashkus,
¿antaati siyaa kukis nuw ksaja mazinachi?

⁵ Mishat, Iy Apanllimand wamin kiyung
kachiykini, anumand

Apanll iyaa kisparee napchiya, ngutis átus,
muchis timuchkus,
kóstaramun kxumaw tamutamur ashkus,
Piy ashkuni, zurampatari mangukaniya.

Apanll anoo pakeeru, chiyaa wanásir napchiya,
átssa.

⁶ ¿Antaati Apanll anoo ksaja napach? Nda.

Na wanásiri anoo zurampatari kamanchintspa,
Apanll ateeja.

Tputs nduntaa yutarit taarangana, anumand
siysa natsakus, tumanshishush kiyung
yachatssa.

Anoo tputsi tashitungangtsa.

Tputs watumshirimand tuwapamaam
pinasakana,

anoo siysa istayarus ksangtsa.

Tputs m'chachurtaku anoo itutsingtsa.

Ashkachus, siy tputsee kiyung yachamaam zu-
rampatari kasatssa.

⁷ Tputs mariz kayatku anoom watungasheem
panangtsa.

Pukiree tputs istakus, pangishis ishinangtsa.

Pukir watunir ndunareewa pakchus, istangtsa.

Kandoozpatatis, tunareetstaa wanasiri
ishinangtsa.

⁸ Ashkinaareesa, zar shitungachu kizpur 'sinitaru
ashiritam kizpur 'sineekus,
nuwsha siyaa kis napchintspa.
Itsinsaru taakus, tputs siyaa wanasirishaparee
napachinllinaya.
Yuwaa kiyung kachiyarangis anoo izuuru pas-
tachshaparee.

⁹ Nuwaatssha, Istanda tákchus, nuwsha zuram-
patari mazinachina.
Nuwaa kizpur kuruzkachus, nuwsha, ¿Maya?
Ashiriya, istachinllpa, táchshaparina.
Siysa, Izuuru ayamtaatiya tputsee kiyung
yachacheezi, tákchus,
tputsee ndunnaa mantsir tsiyatkus,
nduntam yutarit ínakus,

¹⁰ yuw tputs marizimun tsipakana anoo shaantari
watungasheem mbaseerus panakchus,
yuw kiyung kachiyyku anoom ngutiritis istakus,
ashkus, siysa 'sineekpaz ashirus taaksa.
Yuw saana kiyung kachiykis an ndunichshapa-
ree.
Wazareetsiri taatssa, zar wachamuree tamaparee
ashiru.

¹¹ Nuwaana siyaa imachchintsa.
Tsap puzap taaktaateesa,
anush nuwsha siyaam katungsheemis zapan
panachintsa.
Nutseetsis tuwizpurtachina.
Tatsumim tamapari ashirus wanasirshapari kis
taatssa.
Kung uru zaw ashtaru, ashku siyaam pishtats
ndunshaparee.

¹² Siysa pangeetsis yurangamaw yusur wanasis
pangutssa.
Yuwashtam zitaminaris kis taarangana
anshutam taatssa.
Tputs siyaa, Tandapunumpansincha, táchinllinaya.
Mishat, In tputs pangumpansincha, siyaa
táchitamanaya.
Apanll siyaa átcha.

Uru zar kanusish chinangtsa

Aparini siyaa ateeja.

¹³ Zar kanusissheem nuw wayaranguri,
Anush zar kanusangtsa, siyaa táranginawa.
Ashiriya, nuwaa kuki kpintspa, atashina.
¿Mayaamaja anush zar paxanxtangat ashiksa?
Kanusisisish mangis kis shambatangtsa.
Anush zar uru nuwaa chinangtsa, watam
nuwaana wayaranginawa.
¿Mayaamaja anush zar tarawazureemis chinachis?
Yuwari zandkich anoo ¿mayaamaja ashtachich?
¿Antaati piy ashkus wanasisreeja?
¹⁴ Zar kanusish nuwaam kanuskachinaareesa,
nuwamun kisshaparee taatssa.
Nuwsha siyaa istakachuri,
uru siyamari kasirus taatssa.
Zitaminaris Akoparini siyaam wanasis
tsiyatarangu,
anoo kis pangatssa,
waana iy Aparini Taarashipan siyaa tárangeiya.

60

Yakat Irusarina kizpur wanasis taachiya
Apanll siyaa Irusarinshuchetsis átcha.

¹ Irusarinshuchis, chiyzangints.

Wanasirimish na taartanda.

Watam Apanll siyash kuseenlluwa.

Siyaa wanasisr paku, kis napchiya.

² Tsapurunasish ichingaru tunee ashikcha.

Piyartach tputs tapishpaz ashiru pátagtangat
ashkanaya.

Itaru, Apanllsha Taarashipani siyaam tuwasi-
neekpaz ashkiya.

Apanll wanasisrimish siyash kis taachiya.

³ Arapich tputs siyaa wanasisrimshee pakchusin,
siyangaz kizpur zandchinllinaya.

Urkartam ichingarusin siyap naachinllinaya.

Siy zarpaz ashiru taakchus, siyangaz zandach-
pasinaya.*

⁴ Siy ichingaroo napangtsa.

¿Kamaparee arapich tputs siyap kus kus ashchinlli-
naya?

Siyash Irusarinush shaniypani atanaya.

Siyachich tputs tsapurunasush arap taaktaatssin,
siyash kuschinllinaya.

Siyachchee kizanur pachipeersin, yusur siyash
wayachinllinaya.

⁵ Anoo pakeerus, kachis munitssa.

Ashkachus, mangis kis shamangarus taatssa.

Kuskusin, musash marush arachich kurikee za-
pan yachinllinaya.

Arapich tputs siyaa chinakchusin,

urikee ¿wanipaja siyaam panachinllina?

⁶ Kameech zapan shurangaru, anush

* **60:3** Apanll wanichu anu 21.24 tsiyatsis nipta tatsamooru taaritamta.

siyaam kurikee, mishat yasin kzammashetstam
wayawaytangat ashtachinllinaya.

Madiyanamand, Efamandtam, Sambamandtam
káyarusin, siyaam wayachinllinaya.

Siyaa pakchusin,
¿Apanll tamara? ¿Waninll Irusarinshuchee istaka?
táchinllinaya siyaatsiya.

⁷ Siyaam Kedarshuch opeejarini panachinllinaya.
Siysa Nebayotshuchee opeejarini karupan Apan-
lleem muchitssa.

Anoo pachayarus, Apanllimun wasuma wayatssa.
Kisshaparee Apanll anoo ishingku,
waanaatsi pangu kis chinachiya.

⁸ ¡Napangtsa! ¿Chak an tputs msaspaz ashirusin
kanindap naanataraa ashkana?
¿Chak an mukukpaz ashirusin waanpee puran-
gataraa ashkana?

⁹ Pa. Mundariy zapan washunand kambusurush
naakana.

Társisshuch mündariy imazakanaya.
Irusarinchich nlluranur araptaa taarangsin,
zaruyarusin kuskanaya.

Oroo xanatkana. Kurikee mbammash zapantam
wayakanaya.

Israelchichee Apanllirini kizpur chinaksin,
Taarashipanee kis shambateeni, atusin,
kuskanaya.

Watam Apanll yaktaa Irusarina wanasureem
ínaranguwa.

¹⁰ Arapchitaa tputs siyaa istaksin,
yaktaa watandpunu yusur wanasisir wayachinl-
lina.

Urkarsha m'chachoom kinachinllinaya.
 Watam sirú Apanll siyaa tsianuspa waneerangu,
 na siyaa chinakuwa.
 Apanll siyaa natunaa nayaniku,
 siyaa kis chinakiya.

11 Siy kisa na mapiyrus taatssa.
 Irusarin watandpun wapshtushi uru tawatam
 taachiya.
 Psaantam, kaschiritam ¿mayaamaja shtandachich?
 Arapich tputs maachee yuw arap waritaku anoo
 siyaam wayat wayat ashchinllinaya.*
 Urkarsha wipunashpatari kusatataraa ashchinlli-
 naya.

12 Tputssha siyaa niyrkusin,
 uwshtisin tsipachinllinaya.
 Urkarpatarit washunandari kachingchinllinaya,
 Apanll siyaa Irusarinshucheetsis tárangeya.

13 Apanll Taarashipan ateeja.
 Libanush káyandsin,
 siyaam maachee kizpur wanasis yushindachinlli-
 naya.
 Apanlee pang' wanasisreem ínayani, atusin,
 karipanaa washitan zapan siyaam panachinlli-
 naya.
 Ashkatssin, nuwsha kis anush yusur pshtuyaruri,
 naanat ashchina.

14 Sirú tputs siyaa kiyung yacharangusin,
 siyaa yutaritaam ínarangusin,
 natsha uw nlluranur siyaa kis napchintsa.
 Nlluranursha siyash kuseersin,

* **60:11** Apanll wanichu anu 21.25-26 tsiyatsis nipta tatsamooru
 taaritamta.

siyaa ungirtachinllinaya.
 Siyash tutunlltayarusin,*
 Nuw shiyyaa kurakartana, táchinllinaya.
 Yaktareetsis, Apanll Taarashipancha yaktarini.
 Israelchich Apanllirini Siyonamandari kis nap-
 kiya, siyaa táchinllinaya.
 15 Natsha ndusha kasampaz ashirus taatssa.
 ¿Chakaja siyaa natsach? Wanindaja.
 Itaru, urutamari arapich tputs siyaa kis chi-
 nachinllinaya.
 16 Watungashee kizpur wanasisr siyaam panacha-
 pantsa.
 Urkarsha waanaatsi maachiri wanasisrimshee
 yushindayarusin, panachintsa.
 Anushsha, Apanll waana iyaa Irusarinshuchee
 tapachindachiya.
 Apanll iyaam kundarareetsini itutsirangya.
 Watam Apanll iyaa Akoparinchicheetsini kizpur
 istaranguwa, táchspasa,
 Apanll átcha siyaa Irusarinshucheesis.

Mishat, Apanll siyaa atitamcha.
 17 Nuw siyaa kapung istakchuri,
 ngusambaa bronsi ndusha panakuri,
 orootsimsha panachintspa.
 Ngusambaa mbammashhee ndusha panakuri,
 oroo mburshimashetsimsha yátssa.
 Karipanaa ndusha panakchuri,
 ngusambanandarisha bronsi xanatatssa.
 Patumbichpa kapungumashpa ndusha pangukus,
 ngusambpasha pangeemis pangutssa.

* **60:14** Apanll wanichu anu 3.9 tsiyatsis nipta tatsamooru taaritamta.

18 Siyash tsapunis tputs waanpatatin kiyung
yachaksin,
zamangakana anoo ndusha mazinatssa.
Kundararis ndunsha siyash kuseeru,
pachachintsa.
Ashkachuri, yaktaa watandpun, Tapachindampa-
nee, átus, ísamatssa.
Mishat, yaktaa pshtushee, Apanlli yaseesshee,
átus ísamachtampasa.

19 ¿Mayaamaja kaschir zar zatach?
¿Mayaamaja tsup psaan 'sineech?
Watam nuwsha, Taarashipani siyaam urutamari
'sineekpaz ashiru taachinawa.
Nuw siyaa Apanlleeruri,
siyaam 'sininitaraa ashtachima.*
20 Nuw siyaam zarpaz ashiruri uru 'sineekchuri,
ayamtaati tsípcheeja.
Nuw siyaam tsuppaz ashiruri uru taachima.
Ashkachuri, ayamtaatiya suris ndunichshaparee.
Watam nuw siyaam urutamari tuwasineeru
taachinawa.

21 Siyashuch ichingarusin kurak taachinllinaya.
Urutamari tsapuneetsis ksutatssa.
Nuwaana zandaranguri,
nuw siyaa Yusur wayachintspa.
Yasin wanásirimash ashirus Yusur kxunakpaz
sheerus taatssa.
Ashkachuri, ztaru tputs nuwaa chinachinllinaya.
22 Siy anuri pakchitaa kuwiz m'cheeru taarangus,

* **60:19** Apanll wanichu anu 21.23; 22.5 tsiyatsis nipta tatsamooru
taaritamta.

nimun yusur milshaparee tputsis taatssa.
 Ashkachus, tsapunshish siy tatsitatssa.
 Nuw siyaam taarashee panampantana.
 Yuwash zar waritakchu, anush nuwaanaatsi kuki
 uru tuminchima,
 Apanll tárangeya siyaatsi Irusarinshucheetsis.

61

Apanll Israelchichee tputs tapachindachiya

[Apanll wipunash waana átcha.]

- 1 Apanll Taarashipan wani nuwash wizpur taachiya.
 Apap nuwaa ipuseeru, wipunasheemsha ínarangiya.
 Nuwaa kamachtaku, Yuw kiyung kachiykana anoo istashini, tárangeya.
 Pukireem nuwaa kuki kamanishini.
 Putamawaa tputs yanpushini.
 Tumanshishush wantsush taakana, anoo tashitungangcha.*
- 2 Yuw kiyung kachiykana an nimun kiyung kachiyachtazinllinaja, Apanll átanda, tángcha.
 Na musápa Apap iyaa istamaam kuschiya.
 Apap iyamand kundarareetsini kisatachiya.
 Apap nuwaa, Yuw tputs mang' mantsakana, anoo mangoo tuwizpurtangcha.*
- 3 Shiysha ipunshee, Siyonshuchee tputs mangoo yarangcha.

* **61:1** Matiwa 11.5; Lukasa 7.22 tsiyatsis nipta tatsamooru taaritamta. * **61:2** Yuwaa nish átu anootstam Lukasa 4.18-19 tayusima kamankiya. Mishat, Matiwa 5.4 tsiyatsis nipta tatsamooru taaritamta.

Sirú mang' mantsaksin, masunllpa muchimun
tapararangana,
anoo shiyhat kapeeteerush, wanasirsha
tútiyachtayarush ksangcha.

Ndusha mang' mantsaksin taamaama.*
Kzammashee mang' ksamaam tparangcha,
tárangeya.*

¿Tamaycheezich? ndusha tputs táchiya.

Apaa, shiy kizpurtishcha.

Shiy iyaa kapung istaksha, tputs táchinllinaya.

Tputssha siyaa Irusarinshuchetsis, Apanll tatsumarinee wanasirimishcha, táchinllinaya.

Simbunpaz ashirus kizpur wanasir taatssa,
tángcha,

Apap nuwaa tárangeya.

Apap ashkachu, tputssha ichingarusin Apanlee
wanasirimshirini pakchinllinaya,

Apap nuwaa kamachtaku tárangeya.

⁴ Pang' yurangamawaa yusur panguchinllinaya.
Undarar sirútari pangoo kapeetarangtaa,
itaru, natsha nimun yusur wanasir taachinllinaya.

Yaktareetsis kapeetamawmuntaa, anush yusur
siy kis taatssa.

⁵ Arapich tputs chineetsis ksutkusin taachinllinaya.

Tatsumareetsis puyachtamsinaya.

Kizarunaa tatsumma napchinllinaya.

⁶ Siyatssha apanllpaneem ínachinllinaya.

* **61:3** Matiwa 5.4 tsiyatsis nipta tatsamooru taaritamta.

Wanga 19.40; 12.7 tsiyatsis nipta tatsamooru taaritamta.

* **61:3**

Taarashipanee iyaam mashangandama,
táchinllinaya.

Arapich tputs shiyyaa chinakchusin,
siyaa kurikpaneem ínachapantsa.

Tputsee wanasisimshee saanshu pangis
ishinanaw ashitssa.

⁷ Sirú siy kiyung kachiyarangus,
itaru, natsha nimun mangis kis kizpur taatssa.

Sirú tputs siyaa yutaritaam ínarangunts,
itaru natsha tputs siyaam mangutari urkiree
panapantar ashchintsa.

⁸ Waana Apanll tatsamooru yasayaru istakiya.

Washchiree tputsi natsakiya.

Wapchaatssha tputs tsiyantakitamta.

Itaru, siyaatsinaa tatsamooru istachiya.

Siyapat urutamari amikurtachiya.

⁹ Siy iparis tsapurunasush kizpur taachinllinaya.
Arapich tputs, ¿Tamaru Irusarinshuch taakanaya?
táchinllinaya.

¿Tamaru Apanll Taarashipan istaka?

Watam Apanll waana tiptsiriwa, siyaa iparis
táchinllinaya.

¹⁰ ¡Nuw Apapamand, Taarashipanimand ksumish
mangi kischa!*

Waana Apap nuwaa mangi kis taamaam wa-
yarangiya.

Apap nuwaa kapung tapachindarangiya.

Nuwaam kurakaam ínayaru, nuwamari kasikina.

* **61:10** Lukasa 1.46-47 tsiyatsis nipta tatsamooru taaritamta.

Kizaatspaz mashkuri ashiruri mangi kis shambat-kina.

Kiz zaranllpi átu, wayarangashee mang' kis yártaru ashiruri mangi ksakina.*

¹¹ Napa: Yuwatoo tatsumeeruch,
wanasir kxuntaru ashikpaz ashiritam,
Apap iyaa kizpur wanasir istakachu, kissha taa-chiniya.

Ashkachu, arapich tputs ichingarusin,
Apapaa yaseeksin, shambatchinllinaya,
tárange Apanll wipunashi.

65

Apanll tputsee yutaritshishpani waneekiya

¹ Apanll Taarashipan átcha.

Tputs sirú nduntaa nuwaa masharangsin,
natsha nuwaa, Istangasinda, atanaya.

Tputs nuwangaz nduntaa nachungarangusin,
natsha nuwaa parangusin, nuwash kusaranganaya.

Tputs nduntaa nuwaa, Apaa, tapachindanda,
tárangeusin,
itaru natsha nuwsha, ¿Maya? Natu tsiyatangan-dama, atina.*

² Ichingaru zar nuw Israelchichee kuruzaranguri,
Nuw siyaa istapi, atina, tárange, kuwi nguti paxa ashirangina.

Ashkitaati, siysa nuwaa niyrarangus,

* **61:10** Apanll wanichu anu 21.2 tsiyatsis nipta tatsamooru taaritamta. * **65:1** Yuwaa nish átu anootstam Romshucheema 10.20 tayusima kamankiya.

zurampatari nuwaa ngatarangsa.*
 Yuwari saana zandarangis,
 anuri kis chinarangsa.
 Siy yutaritaringaziri zandarangus, anootsim
 payurangsa.

³ Siy putam putam nuwaa kachi parangitaatis,
 nuwaa yutaritam ínarangsa.
 Siy kis apanllputsee chinarangus,
 tatsumshishee wanasirimshi ungirtarangus,
 ladrichumun maachee wayayarus, mbutarangsa.

⁴ Siy kis tsiparip mapshiship kuxinxinaw ashkus,
 kanizpat kis tsiyatarangsa.
 Psaan upusap naayarus,
 arutamangaz nachungarangsa.
 Mishat, mantsamoo k'chee wanuts
 chirimbuchirishis masamurtayarus,
 kis katungarangsa,
 Apanll tárangeya yutaritshishpaneetsi.

66

*Nuwamaritana kizpur taaki, Apanll nuwaa
 Isáysaatsi tárangeya*

Apanll Taarashipan átcha.

¹ Nuw tsirari kaninda kánuru taariya.*
 Anumand kuxinkuri, kutsi tsapurunasimun katk-
 ina.*
 Ashirucha, amb ashkuri, nuw kizpur taakina.
 ¿Tamareeja siy tputsis nuwaam pangí panguchis?
 ¿Yapeeja nuwaam kanusamaam panguchis?

* **65:2** Yuwaa nish átu anootstam Romshucheema 10.21 tayusima
 kamankiya. * **66:1** Matiwa 5.34; 23.22 tsiyatsis nipta tatsamooru

taaritamta. * **66:1** Matiwa 5.35 tsiyatsis nipta tatsamooru
 taaritamta.

Izuuru pinasaksa.

2 Watam nuwaana maacheetsi ichingaroo
tinaranginawa.

Nuw ndunnaar tinaranguri, ḡashireeja maachi
taar?*

Apanll waana tárangeya.

[Watamari nuw Isáysi kuki.]

* **66:2** Yuwaa nish átu anootstam Tayaspataampani 7.49-50
tayusima kamankiya.

**Candoshi-Shapra
New Testament in Candoshi-Shapra
(PE:cbu:Candoshi-Shapra)**

copyright © 2010 Wycliffe Bible Translators, Inc.

Language: Candoshi-Shapra

Translation by: Wycliffe Bible Translators, Inc.

Candoshi-Shapra

cbu

Peru

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Candoshi-Shapra

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

xcii

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-04-30

PDF generated using Haiola and XeLaTeX on 29 Apr 2025 from source files
dated 30 Apr 2025

855c1646-aaa4-5dab-a701-8197de4af05f